

環球



黎元洪題



環球日記

陳榮昌題籤





錢士青肖像

環球日記序

憶自髫髻時。卽嗜讀西行各種日記。如李小池環游地球新錄。薛叔芸出使四國日記。曾惠敏使西日記。劉雲生英輶日記諸書。靡不一一涉獵之。披覽之餘。輒悠然神往於東西兩大洋風濤澎湃之間。以爲丈夫生當世界大通之際。苟不得作九萬里汗漫之游。徧覽其山川人物之優美。政治風俗之良善。是虛此生也。壬寅癸卯間。留學在京。極欲專習西文。以爲遠游之備。友人尼之。不克如願。丁未南旋。僅便道游日本。回滇忽忽十餘年。仍未得一償初願。而兩鬢已星星見白矣。國事日亟。世局益新。壯游之志。曾不少挫。未識能終償此願否也。同學廣德錢君士青。與余抱同一之志。肆力英文。畢業後供京職未久。卽銜命監督在英留學生。復由英而美。而日。環游地球一周。民國三年。復任舊金山領事。一再往復。於各國之政教風俗。沿途之舟車氣候。考查至精。紀載至密。成日記四冊。其所以貢獻於吾國。箴導於吾民者。意渥且厚。其在英請定留學官費。在美建議華茶獲獎。尤嘉惠於士商。蓋錢君不惟學識素優。而毅力槃才。又實足以副之。其成就故如是之宏大也。不佞與錢君共事滇省。前後四年。苔岑之契。久而益摯。己未之春。錢君奉調長蘆。行有日矣。出所著日記。屬弁一言。爰述不佞未遂之志。以見是書所

環球日記 序

二

歷之不易。莊子有言。彼於致福者。未數數然也。此雖免乎行。猶有所待者也。余其猶有所待者耶。讀錢君是書。滋愈怦然矣。

民國八年正月望日姚安由雲龍序



環球日記序

廣德錢君士青以博通中外之才。性耽著述。持示其環游日記屬余序之。余愧不文。奚足辱命。顧交君久。知君深。雖不文。敢無文哉。間嘗出滇郭。登鐵峯。見摩崖巨書深刻曰海關峯高。稜稜有生氣。歎賞久之。審其題名卽君筆也。君徧游全球。佳山水庸可僕計。獨推吾滇之勝。韻頡瑞士。古之人推吾滇之勝。頡頏中洲者。吾聞之屢矣。韻頡瑞士之論。則自君始。夫遇佳山水而不爲表章。謂之負山水可也。非山水而爲之過譽。謂之諛山水可也。負之與諛。曾何取焉。君本政治長才。居吾滇三年。經理鹺務。秩如裕如。政務之暇。留意山水而表章之。山水之緣信矣。抑亦相契更有在山水外者。又何論乎負耶諛耶。中國自有史以來。凡人之可傳而不傳者何限。其傳者或藉於書。而書有竹木縑紙之迭嬗。存真者懸。於是金石之學興。今欲窺三四千年之真相。則摩崖刻石之屬絕不可廢。推之千萬年後。其視今也。亦猶今之視昔。其視今之所謂昔。所謂今。或較今之所謂視昔。視今。而更進焉。未可知也。何也。理境之日新也。學問之無窮也。吾欲預言。而亦無庸預言之者也。姑以今言。君作汗漫遊。丹鉛記載。積數尺許。元元本本。令讀者神遊其地。以余見君之摩崖數字。且傾倒如此。知世之讀君書者。必傾倒如余。不待問矣。君其付

環球日記序

諸剗。播諸中外。庶有以驗吾言歟。

民國八年正月望日石屏袁嘉穀樹圃敘於滇省移山簪



自序

登喜馬拉亞山阿爾卑斯山則世界無大山矣。涉太平洋大西洋則世界無大川矣。見歐美各國政治之完備。則他半開化國無足觀矣。然無他山不足以顯喜馬拉亞山阿爾卑斯山之崇高。無他水不足以顯太平洋大西洋之廣闊。無他半開化國不足以顯歐美國政治之美備。天下事無不待相較而後知。所謂權然後知輕重。度然後知長短。苟不出戶庭而欲確知天下事。難矣。余十年就學。志在游歷重洋。兩字象韉。心冀置諸莊嶽。宣統己酉秋。奉派赴英管理游學生事務。由亞而非而歐。在英四年。頻赴大陸諸國。實地考查政治。兼充海牙德育暨萬國人種各大會專員。聚五十餘國代表於一堂。得以研究教育。迨監督處裁撤。余又西渡大西洋。繞道美洲日本回國。美爲民主之邦。日爲比隣之國。其學術政治。尤應借資考鏡。以冀取全球之長。補我國之短。此行得以曠觀世界名山大川。政治風俗。遂余素願。綜而論之。言西則英德軍雄海陸。美比業勝農工。法意善於美術。俄奧泥於守古。瑞士中立。以山水名。荷蘭首都。以仲裁著。言東則日本軍事工商。亦漸發達。至物產之富。風俗之厚。則各國又不及中華。此非余考查比較而後知。亦東西人士所共認。如啓發原有之風俗。開闢天然之物產。我之富強。大地莫

與京焉。東西各國雖富強不一其道。然大本大源。端在教育。國民而有教育。無事不可以振興。反是則國無以自立。蓋人才出於教育。政治之隆污。全視人才之多寡。萬流朝宗。必歸於此。有國者當三致意焉。回憶余赴英時。由東而西。返國時。則由西而東。已環游地球一週。計程九萬里。余於民國壬子冬。奉派充膺領職。重游美洲。兼充巴拿馬賽會本省代表。並充審查萬國賽品專員。行踪所至。遇事必書。但頻年東西奔走。而斷編殘簡。遺失殆盡。幸距游歷之日不遠。尚能記憶大略。然已百不得一矣。若再遲數年。恐並此而不能得。故乘暇日。筆之於冊。付諸手民。藉留雪泥之鴻爪。而便未出國門者之臥游。惟挂漏紕繆之處。知所不免。尚冀海內宏達。有以教之。幸甚。

中華民國八年正月 日皖南廣德錢文選自敘於滇垣稽核所

環球日記

游英日記

清宣統二年秋八月余奉派充當考試東西洋游學畢業生內簾官甫經出關。即蒙學部會同外務部奏派駐英游學生監督。當即趨謁外務部鄒尙書。承示新簡駐英劉欽差。駐奧沈欽差。均不日就道。劉公遵海而行。沈公由陸而往。茲分別給函紹介。可前往面談。余遵即趨謁劉沈二公。惟沈公行期已定。不便請其久候。不得不與劉公同行。且思由海而往。沿途經過處所甚多。可以游覽。藉便考查。遂與劉公約定十月初旬在上海會齊放洋。余領得外務部護照一紙。係由駐京英公使簽字。（後查知赴英無須護照）即出京。余先期赴滬。置備西服。整理行裝。事稍就緒。即往西洋理髮店將髮辮剪去。易裝以後。恍若兩人。即係素相識之人。驟然見之。亦不能辨別。良以當時易西裝之人尙少耳。然余初易西服。硬領在項。似覺不甚適意。旋即易去西裝。仍着華服。在滬會晤劉欽差葆森。暨張杏蓀參贊。商定放洋日期後。即定船位。

宣統二年十月初七日（即一九一〇年十一月八號）由上海乘大英公司小火輪。下午兩點鐘至吳淞口。登大英公司 P. & O. 海船。名亞溪的亞 Acadia。此船載重七十噸。較之昔日薛



庸菴星使出洋時。所乘三千五百三十二噸者又大一倍矣。余初次出洋。船中規則諸多未諳。該船管理員名科克路 Cockerel 者指點一切。即便室浴池。亦皆指明處所。該船伺役。多係印度人。能操英語。客房內有鈴。若呼喚伺役。按鈴卽至。惟按鈴只宜一下。不可連按。房中預備有冷水。若需滾水。英語云 Boil water 若需熱水。英語云 Hot water 若大便。則喚伺役云往 W. C. 彼卽導之。既知處所。以後可不必再喚伺役。惟大便。須將廁所門關上。此種俗規。亟應留意。二點鐘。劉欽差乘上海道之鈞和兵輪。至海船。船主及一切人等。皆拱立迎迓。甚爲齊整。所有箱物。不應使用者。存入箱艙。若需用者。則放在自己房間內。在上海未動身時。須先向大英公司賬房。取箱條數種。若小件應用者。則貼歸客艙之條。英語曰 Cabin 如大件須每日取用者。則貼應用之條。英語曰 Wanted 如實不用者。則貼不用之條。英語曰 Not wanted 皆須一併貼明。行李下船時。伺役卽爲佈置。惟在上海該公司打票時。須問明自己艙位號數。俾下船時。可以尋找。箱物亦須標明號數。庶不致錯誤。凡大件行李。實係不用之物。必待到所達之地始取者。方可貼 Not wanted 之條。卽代下大艙。與貨堆聚一處。一時取不出也。行李總以下箱艙爲便。箱艙之物。每日取用者。上午十點至十一點。下午四點至五點。爲取物之時。過此則待

次日矣。禮拜不開箱艙。會食上午九點早飯。十二點午飯。下午四點茶點。七點晚飯。如有暈船不能出食者。可以命伺役送食品在房中食之。我國人喜食米飯者多。上飯廳喫外國大餐者甚少。且食多不飽。或因暈船。均可以命茶房煮米粥食之。惟在上海時。須多帶小菜食品。以備不時之需。小菜以上海泰豐公司罐頭食物爲佳。此外食品。可隨便購之。水菓似不宜少。船上雖有。但不能多取耳。

初八日

是日微有風浪。大吐者一人。不食者數人。能食而不能起者又數人。余亦覺頭暈。然能食米粥。此次同船者。除劉欽差外。尚有參贊張杏孫先生。鄧君耕仙。勞君伯善。劉君斗樞。劉君壽田。曾君約農。章君達夫。黃君旭東。龔君子豫。鄧勞劉章四君。爲館員。劉曾黃龔四君。係赴英自費留學。下午風浪平靜。張參贊來云。在艙中反覺困悶。不如上船面吸海上空氣。有益衛生。且可不暈。遂起上船面。頗覺安適。劉欽差久經出洋。曾歷滄海。云今日可謂異常平靜矣。大眾可以出艙外散步。張參贊約赴管理室。查詢事件。囑余爲繙譯。管理云。由馬瑟（法國口岸）上岸。乘火車至倫敦頭等需費二磅十四先令。如乘二等。需二磅十二先令。蓋船票頭等者已多付四磅

餘。二等已多付二磅餘。除多付之款外。故應各找此數耳。英法各國火車。頭等可帶行李六十磅。多過此數。則每二十磅收費五先令。如過二十磅。多一磅。亦作二十磅論。亦收費五先令。并云每年正二三月。以及四月上半月。爲有大風浪之時。四月下半月至五六七八九等月。爲海上平靜之時。十月十一月。爲無大風浪之時。然天時難定。究難預測耳。西人每年返國者。多在四五月。如在此時。放洋之人。必早信知該公司。俾便代留艙位。以免臨時有人滿見遺之事也。

初九日

是日天朗氣清。海面平靜。輪沿廈門汕頭而行。遙望高嶼延綿。星羅棋布。汕頭口門亦佳。船近香港天氣和暖。大似仲春時候。船中備有打球擲圈各種遊戲器具。以助搭客興味。同人各試習一次。晚間繕平安家信。并致書何教習。云由馬瑟上岸。乘火車直達倫敦。請其在倫招待。此船大餐間。備有信紙筆墨。隨意取用。船中有郵票出售。洋一角。可購二本土郵票一紙。即可將信寄至各國。船上并有信箱。可以投信。

初十日

早七點至香港 Hongkong 因欲赴港購買洋氈。遂與勞黃龔諸君上岸。勞君有友人麥君引

導買物事畢。遍遊花園山景。并乘上山電車至山頂。如立懸崖。而所以能由下而上者。則山頂設有機器房一所。內置機盤。車路中有鐵繩一道。上山則收鐵繩。下山則放鐵繩。既有電力。上下甚易。且不致歧出。往來一次。頭等車費五角。初乘此車。如入雲霄。誠爲快事。山頂有英總督避暑行轅一所。山後亦有洋樓。然不如山前之多。香港天氣和暖。無嚴冬酷暑之時。四時草木不凋。沿途異草奇花。芬芳撲鼻。錦鷄壯鹿。棲舞林中。遊人或轎或步。連袂而行。綠女紅男。相望於道。而翠竹蒼松。更與綠水龍山（九龍）相掩映。眞乃別有天地也。港中街道寬廠。屋宇連雲。較之上海尤爲壯觀。港分上中下三環。沿海者平坦。電車與汽車爭馳。依山者欹斜。臥椅與顯轎共逐。港中設英總督一員。按察司一員。英撫華道一員。分理民事。所謂撫華者。蓋撫治香港華民耳。香港口門甚狹。內部寬大。爲最良之海軍港。水亦較深。巨舟可入。對岸爲九龍。九龍下爲尖沙嘴。皆環列以作屏障。誠爲天然鎖鑰。軍事重地也。當日諸公昧昧。以爲荒島。無足重輕。是以將此最良軍港。割去而不惜。余登臨斯地。俯瞰河山。不無浩歎。港中華商總會。帖請劉欽差及同人等茶會。余等因購物回遲。未及與會。港中有育才學堂。九龍學堂。皆係華商出費設立。港中居民。多係粵人。閩人不過十分之一。廣東之貨物。多由此出口。故粵商居多。廣東風氣

開通較早者。亦因受香港之潮流也。近日港中盛倡剪髮之議。多以剪辮爲榮。創有剪辮不易服會。此風刻下大行。并有一種諧論。云每人將髮辮剪去。售於外國。中國人民號稱四萬萬。除二萬萬女同胞外。尙有二萬萬男子。以一人五毫計之。可得一萬萬元。以無用之廢物。易有用之金錢。計甚得也。言似近諧。理非無當。余在上海謁張杏蓀參贊。云髮辮可去。華服不必驟改。俟抵英京時再易裝。着西服必諳西禮。否則恐見笑於大方。是以余去髮辮而未易服。西人每以中服較便於西服。惟不以髮辮爲然也。如無髮辮。而着中服。西人甚以爲是。香港有此剪髮不易服會。余上岸時。街中人多以余爲斯會之新會員。余過時。多聞私語。咸以去辮爲宜云。

十一日

早起。見港中雲霧密布。山色迷離。少焉雲散日出。海面澄清。往來小輪如織。粵人多有持物件來船出售者。勞君勸余購睡椅一張。蓋近新加坡天氣較熱。有此椅可坐於船頭以納涼也。余見西人皆有之。是以購備。實出洋之人不可少之物也。十一點鐘。有英總兵離港。印度兵人皆作樂歡送。并拈花作別。臨別各握手爲禮。十二點鐘。劉欽差自香港赴九龍。閱鐵路回船。華商相送至舟者甚多。爆竹之聲。隆隆不絕。船中執事人員。亦相迎迓。一點鐘。船遂起碇出港。余見

港口層層環繞。曲折盤旋。誠東亞之第一港口。Harbour也。

十二日

微有風。船搖動較數日前爲尤甚。然習受者已數日。不覺其苦耳。時見海中魚躍。有一種飛魚。其大不過一尺。在波面飛騰。時起時落。薛叔芸星使日記。謂係躍魚。卽指此魚也。出香港之時。水係綠色。今日水皆青黑色。蓋水深之故也。船主云。今日風浪尙不大。明日當更甚。俟抵新加坡則無大浪矣。姑書此以驗其實。劉欽差擬到新加坡時。囑余同上岸。便充繙譯。考查一切。

十三日

早起天熱。多換單衫。是日奔濤駭浪。立足不定。惟已經過數日。皆不嘔吐。所謂習慣成自然也。管船員與余談及海程事。云由上海至科侖布多用小船。過此卽換大船。所以用小船者。因喫水不深。容易駛行。過科侖布不換大船。則恐不能以當洋流耳。並云由上海至倫敦所經過要地名港。而可以停泊者。爲香港新加坡檳榔嶼科侖布。由此換大船亞丁過紅海至蘇彝士河。過地中海至馬瑟再至磯布那塔 Gibraltar 海峽。此地係英屬。爲大西洋之鎖鑰。渡大西洋至倫敦欲由馬瑟上岸乘火車。則一日夜可抵倫敦。又云自蘇彝士河開通後。向之由好望角者。

今則由蘇彝士河省路不啻倍蓰。由上海至英。計程三萬六千七百餘里。余云設巴拿馬海峽開通。大西洋太平洋可以直達。又可省路多多矣。該船員云。蘇彝士係必開之路。巴拿馬非必開之區。有謂然有不謂然者。且其中困難問題。約有數端。(一)資本不易籌也。開巴拿馬運河之股票不易售。即售亦難立致千百兆之巨款。(二)人工太貴也。在昔開蘇彝士河。人工食物均賤。一日之工資。只須半元。今美人一日作工。必得五元。是不下十倍矣。且今時充小工者甚少。(三)崖石重疊。不易開鑿。即開通後。其利益若何。并無把握。非若蘇彝士河之可計日歲事。定有利益。有此三端。恐一時不能開也。余聽其言。似乎近理。然余心不以爲然。查英人多持穩健主義。每擬一事。必責有成功而後爲之。但天下事必思當爲與不當爲而決定。又何必事事責有成功。余思美人素抱進取主義。必有以竟其成。或不致泥此君之言也。如以工資貴。則可刪去華工禁律。而與我政府訂立專約。准華人前往代開。自易爲力。則省費尤多也。(余至英時。巴拿馬運河尙未開通。今已開通行船矣。)船過越南境。遙望連山不絕。西貢爲越南之海口。船離甚遠。不能目覩爲憾。英德之船。過西貢則不靠岸。惟法公司則繞西貢。蓋西貢爲法之屬地耳。

十四日

風平。舟亦不蕩。與駛長江無異。海面毫無白色水印入眼簾。海上有無風浪。可以此驗之。海面無白色水。卽無風浪。風浪愈大。則白色水愈多。蓋波浪相衝激。卽現白色水也。是日天氣較熱。皆換夏衣。余着官紗長褂。猶覺熱。以時令論之。北京當穿皮衣。以地氣論之。則各處不同。新加坡較熱於香港。香港較熱於上海。上海較熱於北京。天時雖熱。然舟中有浴池。隨時可浴。初乘海船。船上機器水管。多不諳習。初放之水冷。中國人之習慣。多用熱水。是以相率不敢問津焉。實未得其道也。初放之水必冷。如將浴池中之暗塞去之。使冷水流去。稍待片刻。則機器中之水覺熱。愈放愈熱。再將暗塞安好。則滿池皆熱水矣。於上海上船時。可帶毛手巾二條。大則預備沐浴。小則預備洗面。并另備洋皂一塊。船中雖有手巾洋皂。然公共之物。多不潔淨。自備亦所費無幾。如乘頭等艙。必帶洗澡外衣一件。因經過他人之房。如無外衣。甚不雅觀也。

十五日

清晨微有風。然舟不蕩。舟行三日。未見島嶼。今晨則見舟左有一大島。詢之舟人。則云那球腊 *Nature* 島。少焉又見一最小之島。不知其名。自上海至此。旬日海面未見船隻。今晨見船右有

火輪一艘。與余船同行。惟見煙筒之煙隆隆。不見船之全體。行未久。卽落余船後。由此則見余等之船。速力較優也。

船中多不洗衣。每至一埠。則有人來收洗。可早爲換下。恐至埠時趕不及。如至一埠。不能停一日。則不能換洗。此英船亞溪的亞如是也。不知他船如何。至於沿途發信。每至一埠。船中信箱。先一日掛出。所發之信。總宜先期預備。信箱掛出。卽可投入。如俟至埠再投。則信箱已收。無可投也。非登岸自投信局不可。

十六日

昨晚船已抵新加坡 Singapore 而未泊碼頭。至今早六鐘始登岸。新加坡我國總領事蘇劍侯銳釗。領事署二等書記官楊雲史。繙繹曹讓之。及交通銀行總理羅卓甫乃璣。（在坡有年。爲華僑中最有聲望者。）總辦李鐵岑諸君。至舟迎迓。新加坡英國總督。亦派小火輪來接。并有軍隊排列。劉欽差照外交常例。繞行軍隊一匝而後行。欽差先至領事署。同人等則至交通銀行。未幾。同遊明麗名園。此園名花異草。芬芳撲鼻。聞園主初得者。只費二萬金。今則六十萬不易也。園中有大廳一所。陳列古物。均極精巧。未幾。赴南洋華僑商會。商會中所用諸物。皆係

中國品。華僑素抱愛國主義。不用外貨。卽此可見一斑。商會中列有圖像。凡有功於商會者。皆與焉。未幾。赴養正學堂。該堂學生。已排班拱立。堂長費君福基。導入參觀。講堂各處。雖不如內地之美備。而華僑能設學課其子弟。自爲幸事。此外尙有道南啓發端蒙各學堂。因該學堂未約。故均未去參觀。又未幾。赴香山館。及運動會。該會係平日義勇隊之俱樂部也。該隊有二百餘人。盧君爲領袖。受英政府之命令。由英政府發給槍械。保衛新加坡之商務。每人充當二年。年滿願續充與否聽之。此項義勇隊。係自由之服役。非強迫也。以上所至之處。皆先來約。定有鐘點。劉欽差張參贊。及欽差之二位女公子。與余同赴之。他人未與焉。新加坡形勢雖不及香港之雄壯。然地勢平坦廣大。香港不及焉。且入口門之處狹隘。僅一舟可渡。英人握此要害。則東亞海權之命脈。不啻彼操之矣。英人於歐洲之孔道。又東據有亞丁 Aden 西據有磯布那塔 Gibraltar 而紅海 地中海之海權。亦何嘗不爲彼握之。所謂海王者。因彼國民富有冒險心。及有特別智識。而能經營籌畫於數十年前。收效果於數十年後。職是故也。劉欽差與余等。乘電車環遊全境大小各坡。商務繁盛者。名爲大坡。卽舊坡。商務尙待經營者爲小坡。卽新坡。其離坡稍遠之地。居戶星羅棋布。道路四通八達。島邊漁舟番舶如雲。該地依山臨水。風

景極佳。天氣常炎。霖雨時沛。草木繁衍。蚶蚌珍奇亦多。出產以橡皮、椰子、胡椒爲大宗。當日該地僅一荒島。今則變爲名區。惟該處房屋不甚高大。不如香港據山臨海之壯觀。土人多住矮屋。而有一種特別風俗。男子皆不着長衣。婦女不着內褲。而以紅巾圍之。雖大家閨秀亦然。坡中通用之語。多用馬來由語。凡在此經商者。無不習之。中國人在坡中殷實者頗多。馬來人尙黑。以黑油染身。久之似鐵。皆以爲美。貨物不以背而以首。多以紅布縛頭。初以爲印度人。細觀實不然。印人高大。馬來人矮小。印度人黑而紅。馬來人黑而黃。印度人髮短。馬來人髮長。此其區別也。新加坡華僑。共十萬人有奇。廣東人爲多。福建次之。商人熱心愛國者。實繁有徒。余赴各處茶會。見各代表。皆着中國衣冠。頗以爲榮。說者謂果我政府創辦海軍。派專員前來勸募。則可得巨款。然非素有聲望。及與巨商中有聯絡者不可。多云羅卓甫君爲南洋商界巨子。余聆其言論。誠有可佩也。官話一事。甚爲重要。余見該埠不通言語。甚以爲不便。我政府果欲撫慰華僑。當設立一國語半日學堂。派遣人員來此傳習。雖貧民工人皆學焉。或謂政府諸公何暇及此。惟望各該埠中熱心志士組織之。查各該埠華僑中之青年子弟。於西學已有根柢。亦宜注重中文。而後中西貫通。方可謂之有體有用之人才也。

十七日

昨晚回舟太晚。今早起已八鐘。見舟正移泊。遙望遠近島嶼羅列。與綠水青山相掩映。誠天然畫圖也。舟邊常有馬來人。駕一葉之扁舟。載浮載沉。口操英語。向人乞錢。余以錢投水。彼即躍出船外。入水取之。無一失也。少焉舟出口。兩邊時見島嶼。蓋新加坡至檳榔嶼係一狹長海頸。並非大洋。是日波平如鏡。水皆綠色。清風徐來。熱氣全消。邵君煒棠。浙江寧波人。來自新加坡。亦乘此船。擬赴英留學。能操馬來由語。蓋在坡有年矣。余前幾日多食粥。近數日能食大餐。可見習慣成自然也。

十八日

十一點鐘抵檳榔嶼 Penang。遙望兩岸皆山。少焉有該埠之中國副領事官戴忻園春榮。商會總理黎子和。及戴君之公子戴淑原等。(某部郎中)乘小火輪來舟迎迓。查該埠副領事。向係巨商兼充。由外務部月給薪金百元。所謂名譽領事是也。由商人中公舉派充。惟往來過客甚多。每年供應所費不貲。非華商中殷實者不能充之。戴忻園君握有百餘萬之家資。故得充此差也。該埠華僑約有十四萬人。粵人爲多。閩人次之。華僑亦自設學堂。陶育子弟。戴君備有

請帖。請赴商會午膳。張參贊勞劉龔諸君與余皆與焉。午飯畢。赴英國國家公園。參觀瀑布。遂乘馬車至公園口。下車步行。沿途見花草繁盛。香氣逼人。如入桃源。別有天地。將進山谷。見滿山蒼翠之色。印入眼簾。到處波濤之聲。震於耳鼓。少焉近瀑布。見懸岸之下。水出如濤湧。流入一池。池下安放水管。爲檳榔嶼一埠所用之自來水總水管處也。此水味美而甘。飲差以次皆飲焉。遂有一印度人導往各處觀名花。覽盛景。見一肉桂樹。印度人取鮮肉桂示余等。食之甘美異常。此一樹聞值數百金。若在中國內地。可值數千金。枝葉皆香。其次各種異樹奇葩。爲余生平所未見者。指不勝屈。南洋地處熱帶。植物之繁盛。於此可以徵之矣。此地出產以檳榔、椰子、胡椒、荳蔻等爲大宗。椰子樹高大。其頂結椰子。剖之。中有水如甘露。飲之有益於身體。其皮可製作刷子。內殼可以作水瓢。此地四時皆夏。然較新加坡稍清涼。其山水之秀麗。亦較石叻（新加坡亦名石叻）爲佳。檳榔嶼有大檳榔小檳榔之稱。大檳榔爲本埠。小檳榔爲對岸土人所居之地。大檳榔產巨石。多有開闢石礦。以運往他處售之。年得百餘萬金。其土人之服色。與新加坡土人相似。蓋皆爲馬來人種也。遊畢公園下山。乘馬車回商會。車行約二十分鐘。行路約十餘里。道途平坦。樹木清幽。花香鳥語。水綠山青。無處不雅。有地皆春。世外桃源。當推是地。

該地小於新加坡大於香港。惟南洋一帶之商人。久居於外。托外人之庇護。數典忘祖。使我政府能設法撫慰之。其愛祖國之熱心一發動。當勝於內地人百倍也。况其多爲富商。創辦一事。集資尤易。下午五點鐘回舟。臨埠口時。則有英國兵隊歡送。欽差握手而別。至船未久。舟遂啓旋。清風徐來。微雨隨至。因暢遊甚倦。遂高臥焉。

十九日

早起遙望海面平靜。八點鐘舟開駛。兩岸稍見島嶼。若隱若現。下午忽驟雨。遂將炎炎之熱氣。化作一片清涼世界。然雨過熱度如常。轉思我國內地。此時已應披裘。此間猶酷熱如是。氣候之不同。人情亦殊異。此實地勢爲之。使我輩終日處此熱帶之中。亦必志氣懣懣。如土人然。世界以溫帶人爲能聰明睿智。非偶然也。

二十日

風起舟蕩。天氣炎熱。同人覺頭暈者數人。不食者亦數人。惟余如常。但舟行印度洋面。氣覺不舒。舟人云。輪行此間。如不逢霖雨。空氣爲海水所蒸。多覺氣悶。詢之歐人常行海上者。亦云天氣不佳。每多如是。過此則漸佳矣。

二十一日

舟仍蕩。天氣如昨。氣亦不舒。自上海至此。舟行半月之久。未有如此二日之不爽也。下午大雨。稍覺氣舒。初次出洋之人。應知每至一處。上岸當買水菓若干。俾炎熱太甚之時。可以解渴。舟中亦有汽水等。總不若水菓之美。雨後天氣清涼。得以熟睡也。

二十二日

早八點抵哥倫布 Columbo。舟進口。見無天然之海口。僅以人工築石堤以環之。左右各一長堤。中橫一堤。進口則左入。出口則右出。口門以內。巨舟星羅棋布。余等所乘之亞溪的亞 Acacia 船抵埠時。美西敦利亞 Macedonia 船。尙未到埠。少焉此船亦至。外人舟車按期不誤。事以信見重。於此可見一斑矣。船主云。今日尙不能換船。此間總督與欽差爲舊交。相約一晤。欽差一點鐘赴岸。同人則於三點鐘上岸。有一印度人。早已到舟。身披棧夥之帶。言引余等遊歷哥倫布各處名勝。每人二先令。坐馬車在內。同人到岸時。即乘馬車馳赴各處。見街道污穢不堪。土人如鹿豕然。男女皆黑如漆。婦女耳鼻頸中。多戴金器。學堂有一二處。亦多係教會中人所設者。土人見同人。則呼爲支那。此地歸英經營籌畫多年。而竟不能與香港新加坡比美。

者。土人程度太低之故。說者謂香港新加坡華人爲多。其思想程度皆高。故易經營。言亦近理。未幾。棧夥引同人至該處之博物院。多石像水族之類。有一石人長一丈二尺。據言卽八百年前錫蘭之君也。其他佛像無足觀。多以大龜陳列。有一龜大若方棹。言有二千年之久。外有一鯨魚骨。長二丈。遊觀一點鐘之久。卽乘車行。沿途樹木花草。大都熱帶所有者。出產以茶爲大宗。然其茶不過以香爲美。其實實不如我國茶之味厚也。此間土人開有石礦。採取寶石。而飾以金。往往送至舟中出售。一首飾有貴至一磅者。聞此項寶石。每年亦爲出產之大宗云。惟英人重徵其稅耳。哥倫布本無可遊之地。且滿地皆灰土。風起塵揚。滿鼻爲塞。遊未及二鐘。同人卽回舟。轉思此地。當日未入英人之手。尤不知其怪象爲何如也。

二十三日

昨日船至埠。與今日天氣。皆不如前數日海面之熱。且下微雨。天氣清涼。不似酷暑天氣。早十點鐘。舟子將行李各件下駁船。余等另乘公司小輪赴美西敦利亞船。先覓好房間。次赴船旁。查檢運送之行李。一點清。始休息。該船載重一萬零五百噸。較亞西地亞船更加至三千五百噸。舟中臥房。吸煙室。休息室。飯廳。皆寬大可觀。惟伺候不甚周到。彼見中國人。似輕視之。每

棹多係英人爲伺役。惟中國人一棹。則以印度人伺之。其傲慢之習氣。形諸顏色。一國之不振。爲人之所輕視。而我國內地不開通之人。尙夜郎自大。聞之當亦自省。

二十四日

美西敦利亞比亞溪的亞高一層。船身亦長大寬闊。日行達四百海里。其平穩如江船。此數日內。正行印度洋。而舟能平穩如此者。甚爲幸事也。詢諸同舟人云。此船較新。汽機穩固。非有大風浪。不至震蕩。連日天氣亦清朗。恰似我國內地初秋時候。同人無不稱快。該船中有吸烟間。專爲男賓而設。婦女不能入。另有婦女聚晤之所。但男子可入焉。西婦在船中。或閱詩書。或習女紅。終日不輟。皆舉止大方。談吐風雅。不過西俗尊重女權。與我相反。然彼女子皆有學識道德。使我國女學大興。女子亦皆有學識。當不至再如今日之賤視矣。考人類進化之理。無學識者常服役於有學識者。使皆學識平等。決無尊卑之分。天演公例。優勝劣敗。蓋此理也。

二十五日

天氣晴和。波平如鏡。船中飲食極潔。同人皆努力加餐。早七點有茶點。九點有早餐。一點午膳。下午四點有茶點。七點晚餐。早餐午膳。均有點菜單。皆係英文。欲食何菜。卽照單點。晚餐菜單。

多用法文。雜色小菜。多以托盤進之。不欲食者。可不取也。該船規矩謹嚴。中國人初出國門。當事事留心。庶不致見笑外人。晚餐後。有跳舞會之舉。雖船板上稍撒白石灰。而板面仍滑。男女合舞。男以左手支女子腰。女子以右手扶男子肩。男用右手接。女用左手接。男女足尖點地。步聲與樂聲相合。旋轉如龍。欽差之第二女公子。亦入舞焉。合舞者有十數人。舟既平穩。而又有此跳舞會。殊忘身在舟中。誰謂萬里重洋。盡係艱辛也。

二十六日

早起清風徐來。殊覺天涼。隨易夾衫。而舟平如昨。早餐罷。有舟人持名冊一本。請署名人運動會。云舟中無事。久坐則思眠。眠久則神倦。終日閱書則傷腦筋。閒談過多則無趣味。擬組織一運動會。各出五先令爲會資。至運動門類。如打球。競走等。任意選擇。自禮拜一起。（卽二十七日）逐日游戲。以助興味。除星期日外。直達倫敦爲止。有此運動會。則長途又有取樂之具也。船中除婦女幼孩不令出費外。其餘多出資入會。同人以爲不入不免減色。故一律入會焉。

二十七日

自哥倫布開駛以來。波平如鏡。是日早間運動會開會。各競其技。打球擲圈。余則勝之。其餘皆

敗北。午後行抵足之技。中畫圓圈。二人腕下各置一木棒。以手巾縛手。各以足抵。能以此足挑起彼足。彼遂仰臥。推之出圈則勝。又行畫牛之技。先以粉筆畫牛形缺眼。每畫牛眼者。以手巾蒙其眼。三轉而後令其行。付之以粉筆。能以粉筆正畫中牛眼處。則勝矣。午後遇一海船。遂懸旗。查航海之例。船遇船。各懸旗以誌敬。如商船遇兵艦。則商船先懸旗耳。

二十八日

舟平如昨。天氣亦清涼。飯後無事。與同人查閱航海程途。圖中注明每日行若干里。均按日計載。則知何時可抵亞丁也。

二十九日

早九點至亞丁港。港口置有砲台。入口有亞丁埠。背山臨水。山雖不毛。而形勢極佳。街市不盛。出產亦少。港內有兵船二艘。入口門則水淺而廣闊。能容巨舟。見船邊小魚隨之求食。千百成羣。如有網可得無數小魚也。但此等小魚。西人多禁捕之。船抵埠時。又見天空鳥飛上下。隨船而行。大有魚躍鳶飛之樂。當陽光反照。秋水澄清。亦有落霞與孤鶩齊飛。秋水共長天一色之概。傳言印度洋與紅海海面皆炎熱。余過印度洋面。清涼之至。現至紅海亦然。傳言未可盡信。

也。

三十日

入紅海以來。舟稍蕩。然不甚。蓋舟大之故也。觀地圖紅海狹而長。然舟行並不見兩岸陸地。惟天氣較熱。但不過酷。其熱之故。因紅海東北爲亞刺伯沙漠。西南有非洲撒黑那大沙漠。沙漠之氣熱而燥。風至而熱生。夜間非洲沙漠現出一種白色於大空。舟人云爲沙漠反映而現於天也。飯後有人約觀樂歌。初聽樂歌。聞其聲鏘鏘然。而究不能評其優劣。西人往觀者多。並着禮服。鄭重其事也。

十一月初一日

天氣清爽。海波雖揚。而舟不蕩。舟向西北進行。離赤道漸遠。天氣亦漸寒。氣候因地而殊。絲毫不爽也。舟行印度洋洋面較寬。多日不見一舟。自入紅海以來。連日船舶往來。時有所見。尤以今日爲多。來者有二。去者有四。因紅海海面不寬。故得見之。紅海中亦時見小島。夜間燈塔隱然。有電光射出。以免往來船隻相撞耳。

初二日

波濤聲震如雷。浪花四射。紅海成爲白海。若乘小船。則舟未有不蕩者。然此舟仍平穩如常。凡乘船以航大洋者。非萬噸以上不可。舟行漸近蘇彝士查蘇彝士連河。洋面較狹。西南逼近非洲爲埃及及東北盡處。尼羅河斜向地中海流也。非洲以近於地中海沿岸者爲沃地。中部撒黑那沙漠。則酷熱無比。余生於亞洲游歷歐洲道經非洲五大洲可云游歷過半矣。晚間同舟搭客組織跳舞會。及演戲技。着各色人種衣服。改易裝式。甚爲解頤。舟中除運動會外。尙有此種消遣之法。誠可謂助人興味也。

初三日

昨夜已覺寒。今晨皆着夾衣。十一點鐘舟抵蘇彝士河口。泊於海中。停二點鐘時。有收稅員至船。遂由船員請搭客至飯廳。按名逐一點清。蓋每人須納過蘇彝士河之人頭費。船按噸計算。亦須納費。皆由船主出。查開此河之股分票。始則散在各國。今則盡爲英人所有。刻下股票價已達十二倍。例如股票原值十元。刻下可值一百二十元也。下午兩點鐘開行。入運河則見兩邊長堤。中通一線。水道左岸爲亞州之亞刺伯一片不毛之土。山沙地。右岸爲非洲之埃及地。蘇彝士河市鎮在焉。綠樹青蔥可愛。如入桃源。大有江浙內河風景。而潔淨過之。離河口稍遠。

尙有大市鎮。由河口通火車達此大市鎮。再由此以達埃及京都。名開羅。遙見火車烟色隆隆。馳驅甚速。舟行河內。見右岸一片湖河。幾成水國。蓋開此河取泥沙爲堤。土去地凹。復引水入內。則成大湖。右堤一帶。皆種植樹木。誰謂沙土之地。不宜植物。船在運河。駛行甚緩。始行則見河身曲折。繼則直達河中。僅能容一舟。歷三鐘之久。始見寬闊處。類如大湖。實爲古之鹽海。開河時狹處。陸地開鑿較難。鹽海僅掘深故較易也。舟行河內。時見狹岸。時見鹽海。近蒲賽 Port Said 則有最大之鹽海。蘇彝士河長一百二十八英里。行十八點鐘。此河爲法人樂賽 Lesseps 所開。昔僅荒地。今乃泉府。大陸易爲水國。人力可奪天工。一人創設之。千萬人利賴之。我國南北運河。亦係巨工。惜今漸淤。不加修濬。前人苦心孤誼爲之。而後人任其廢之。可慨也夫。

初四日

早起見舟已抵蒲賽埠。該埠位於蘇彝士河之西端。卽蘇彝士河與地中海口交界處。過此卽爲地中海。遙望該埠人烟稠密。洋房林立。少焉有一三畫舫。載五六雛妓。鼓瑟清歌。聲聞遐邇。歌罷卽以洋傘覆之。作乞錢狀。以西人商務工業之發達。尙有此等游民。誠爲異事。然聞世界商務繁盛之區。必有秦樓楚館之設。以隱爲之助。商務愈盛之處則愈多。大有互相表裏之勢。

也。此行見沿途各埠。舟至則有人赴船售貨。尤以此埠爲最多。蓋以地控三洲（亞非歐）水通萬國。運河所收之稅。多爲治河之用。工作愈興。則用人愈多。人愈多。卽商務愈盛。凡一舟經此人舟並稅。所收實鉅。刻下此河僅右岸堤工方竣。而左岸則尙未動工。將來右岸之村落必先成立。而左岸之工程亦必舉辦。兩岸村落如成。商務日盛一日。可斷言矣。查該埠原係埃及地方。旣到非洲。不可不一游覽。早餐後卽與同人渡河登岸。每人三本士。回亦如之。覓有嚮導一人。隨同前往。遊覽各名勝。至一回教禮拜堂。見供奉回教祖麻利墨德之神像。教徒以一草履置同人足上。入觀古物。如木乃伊。以及古時武裝之品等。余初次出洋。得見數千年之古物。西人云讀書不如游歷。斯言誠不虛也。游畢而出。遂乘車至土人街。見街市狹隘。道路不修。磚頭木屑。隨處皆是。草葉菜根。散諸遍地。以致穢氣發生。過必掩鼻。埃及人居屋狹小。有樓亦矮。一種散漫之象。更不堪言狀。售物之舖。雖各色稍備。然無西人問津。以其不潔淨也。觀埃及形色。無不與我國內地鄉市相同。路隔數萬里。地處兩大洲。何其不謀而合。中國古國也。埃及亦古國也。埃及效法中國乎。抑中國效法埃及乎。考諸歷史。中國在先。埃及在後。當埃及效法中國也。中國雖不能比諸歐美。然近年來亦事事改良。不似埃及之泥古耳。余等在街市各處

見乞丐不絕於途。此種劣等民族。不能自立。宜其爲人屬國。外侮之侵。雖云由人。實亦由己耳。每過一處。土人皆呼同人爲支那。殆亦如我國內地人民初見外國人。則呼爲洋人之類乎。由滬至哥倫布舟行各埠。均有華僑。自離哥倫布埠以後。則無華僑經商。亦無流寓者。土人見之者少。是以呼之。無足怪也。最可笑者。土人取水不用水桶。而以猪皮縫成一袋。儼然猪形。以水盛入。負之而歸。婦女之首。多蒙一巾。鼻間穿短黃銅柱形飾品一枝。據嚮導人云。已嫁者多如此。未嫁者無之。此埠昔爲埃及地。故以埃及人爲多。亞刺伯與埃及一水之隔。移居者亦衆。亞刺伯多產良馬。運馬至此出售。常用之馬。價由六磅至十磅不等。至名馬則無定價。有一馬價值百餘磅。日能行數百里。英人多由亞拉伯運馬至倫敦應用。余見良馬多頭。在地食草。其偉壯純良。毛色秀麗。令人可愛。余等至土人學堂。見五六童子。聚於小屋一間。有一黑而老者。攬舉比於上。口授文字。奄奄無生氣。查埃及及亞刺伯人。同爲回教。而文字亦相同。此種學堂。卽我國私塾也。考埃及爲上古文明之流泉。有尼羅河之沃地。有金字塔之建築。凱兒羅 Cairo爲首都。亞力山大 Alexandria 臨海口。素號名區。古多勝蹟。考古者多欲遊焉。今見其土人萎靡不振之象。實令人浩歎。同人遊遍土人街。一入歐市。見道路整飭。樹木青葱。幾似出幽谷而

遷喬木。不覺精神爲之一爽。各國各有地界。皆層樓高聳。花木幽香。綠蔭滿庭。黃花夾道。若以與土人街相比。則有天淵之別。同爲名地。則一穢一潔。同爲人類。則一劣一優。可慨也夫。蒲賽埠不大。未二鐘之久。卽已遊遍矣。最後至海邊。見巨炮十數位。嚮導人云。有大兵艦五艘。各國公使至此地者。則鳴炮致敬。同人遂由海岸長石堤。往瞻當日開蘇彝士河法人樂賽之銅像。此河開已四十年。正我國同治七年。立銅像處。遙望海水澎湃。波濤洶湧。一片浪花。起落可愛。同人幾不忍舍去。見左岸亦有一長石堤。蓋有二長石堤。方能成港。可爲避風之所。巨舟皆聚焉。長石堤以外。皆爲地中海。同人遊畢回舟。給嚮導人三先令。照章每句鐘一先令半也。回舟時見有土人玩戲法者。觀其變法。皆神乎其技。是日劉欽差赴該處兵艦拜某提督。不久卽歸。下午四點鐘舟卽駛入地中海矣。

初五日

連日波平如鏡。惟天氣殊寒。自入地中海以來。則着棉衣。早晚尤寒。回憶自上海出發。屈指尙未匝月。而寒熱溫涼互易。四季天氣皆經。誠爲快事也。日昨經蘇彝士河查檢人數。船員先請白種人。而對於日人印度人點名時。皆以先生呼之。獨於華人毫不稱呼。僅以計數之法計之。

而已。其輕視華人如此。嗣後出洋者。總以改裝爲宜。否則愈令人輕視。昨至蒲賽。同人有未去髮辮者。童子皆呼爲豕尾。卽成人亦如之。改裝非棄舊喜新。實時勢所趨。不得已也。

初六日

是日天寒舟蕩。因在舟日久。習以爲常。則不覺也。船中飯廳與同人一棹者。有印度人一名。其貌黑而惡。聞亦係赴英游學。每膳不諳規則。種種貽笑大方。初到舟。伺役以菜單進。彼卽以手指第一行字。并未以目覩也。查船中外國菜單。首行列船名。次列餐名。又其次則列各樣菜名。末列本日及所經地方。印度人既點第一行字。伺役則云此係船名。不可食。菜名在下也。印度人則以最末一行點之。乃紅海也。伺役則云紅海更大。不可食也。伺役則不復問。而卽按單之菜進之。其可笑如此。我國初出國門之人。如自己不知西文。每膳當先事詢問同座之人。人必告之。切勿亂點。貽笑外人。

初七日

舟稍蕩。迨入意大利境。舟漸平。舟至西瑟利島。Sielly Islands 卽有口門。左面爲西瑟利之馬細拿 *Massina* 右面爲兒利基峨 *Refegio* 兩岸連山起伏綿延不絕。居民村落相望。山中

樹木雖不多。而青葱可愛。意人多種山地。刻已刈穫矣。

初八日

早起天氣晴和。自舟由蒲賽開駛。泛乎地中海而後。以是日爲風平浪靜。過地中海則爲大西洋。由大西洋方至倫敦。英人於大西洋入地中海。則據有磯布那塔 Gibraltar 險要。出地中海。入蘇彝士河口。則據有蒲賽險要。出紅海口。則據有亞丁險要。出印度洋。則據有哥倫布（即錫蘭島邊之一商埠）及新加坡險要。再進爲香港重鎮。英國稱爲海王之國。良有以也。舟漸近法國口岸馬瑟張杏蓀贊云。彼不欲經大西洋赴英國。以免在舟多受一星期之苦。且聞大西洋風浪更大。尤非所宜。劉欽差及其二位女公子。亦均不繞道大西洋。因劉欽差尙須因公在巴黎勾留一二日。始赴新任。余亦表同意。於是劉欽差及其二位女公子。張杏蓀贊與余共四人。決定由馬瑟繞道巴黎直赴倫敦。免受大西洋之風浪。至於船票改火車之費。前已與船中賬房言明矣。舟抵馬瑟當再言之。

初九日

是日舟抵馬瑟。余登岸稍買水菓。以備次日在車中之食。登岸後。見馬瑟地方雖大。然沿海邊。

街道極壞。泥土堆積。馬糞遍地。而又天雨路滑。稍至一二街。發電至倫敦。即回船。查馬瑟距羅恩河 Rhone 不遠。爲法國出入口之大商埠。亦如中國上海也。晚間即與賬房言明。由馬瑟赴倫敦將火車票代爲購定。余初以爲船公司何能代定車票。殊不知歐洲各大埠。客船一到。火車公司即有人上船。詢問賬房。有客若干。是否乘火車。如有人乘車。即將車票交付賬房。船客逕付費與賬房。以免周折。即自己登岸買票。其價亦同。且由上海赴英。將長途船票買好。其價稍廉。如至馬瑟不欲繞大西洋。亦可由馬瑟乘火車直赴英倫。其由馬瑟繞大西洋至英倫之船價。可以代爲扣下。抵作由馬瑟赴英之火車費。不敷者補之。此皆有便於行旅。似無須自己登岸買車票也。因輪船公司與火車公司本有互相交益之事。而客人亦因之便利。正定車票時。龔君安順。因其甚畏風浪。在船不能多飲食。亦不欲再繞大西洋。亦購買車票隨行。余即將行李一切整理就緒。分別酌賞餐房浴室。船面臥房各伺候。并將大件行李託劉 勞二君代爲由此船帶至倫敦。余不過自帶一二小皮包。因火車上多帶行李。過磅之費甚重也。

查由上海開往英京之船。每兩星期一次。乘船者必於一星期以前函定。否則恐臨時無艙位也。航輪所經處所及日期。以余此次行期例之。餘可類推。茲將行程日期分別列下。

西十一月八號船由上海開駛。

十一號到香港。

十七號到新嘉坡。

十九號到檳榔嶼。

二十四號到哥倫布。

三十號到亞丁。

十二月五號到蒲賽。蘇彝士河之西端

十號到馬瑟。由馬瑟乘火車一日夜到英京

十三號到礮布那塔。

十六號到卜托毛茲。

十七號到倫敦。

由上海乘船直達英京。須四十日。若由馬瑟乘火車。繞法國赴英倫。只須三十三日。由上海至英倫船價。頭等艙位每人六十五鎊。(照市價折合英洋)如寫來回票。只九十七鎊。二等艙位。每人四十四鎊。如寫來回票。只六十六鎊。兒童年在十二歲以下。只收半票。三歲以下之幼孩一人。同其父母在一處者。則不收費。如幼孩多過一人。則收四分之一。船中皆供飲食。僕役每人二十鎊。如由馬瑟登岸乘火車赴英京。頭等車票。每人六鎊十四仙十一本土。二等每人四鎊十二仙八本土。如已在滬納至英倫之航價全數。今欲乘火車赴英。頭等每人可以退還四鎊。二等每人退還二鎊。是乘火車至英倫。所費無多矣。但乘船赴英倫。船上當供飲食。乘車赴

英。車上火食須自行出費。尤須注意者。行李大而且多。必須過磅。所費較鉅。似宜乘船赴英倫。用費較省。惟有等人懼大西洋（過磯布那塔即爲大西洋）風浪。而行李又較少。且欲速抵英京者。則以乘火車爲宜。然尙有一法。如同行者有可靠之人。願乘船赴英。可以將大件行李。託其帶之。而自己乘火車由法赴英亦相宜。但各人情形不同。臨時酌奪行之可耳。

初十日

火車至巴黎須經過里昂 Lyons 埠。該埠近於羅恩河。乃法國內地商務中心點。里昂出絲。織造絲綢。極爲發達。世界出絲各國。以中國、法國、意大利、日本、四國爲最著。法國里昂亦如中國杭嘉湖也。中國生絲品質極佳。爲他國所不及。惟中國不知製造之法。故華絲運至里昂加以製造。然後將綢絹等又售於我國。近年此項漏卮。爲數甚鉅。在里昂不過停車一點餘鐘。不能一游製造廠爲憾。車至巴黎劉欽差張杏蓀參贊等均下車。余與龔君直赴倫敦素耳巴爲繁華之地。本欲下車一游。轉思巴黎距英倫甚近。將來再來。亦甚易易。由巴黎至法國之海邊。地名卡雷 Calais 渡英國海夾。至渡渥 Dover 渡此海夾。雖只一二點餘鐘。但船小而浪大。幾不能立足。余覺在舟數十日。反不及此數鐘爲苦。因英國海夾。潮流甚急。向來如此。惟有時天朗

氣清。風浪較好耳。渡海後卽上英國火車。見其規模宏大。較勝於法國火車也。到倫敦柴鈴渴
鬧司 Charing Cross 車站下車。卽有游學監督高逸君號匡生。先與游學生龔安慶等來接。
遂乘汽車至監督處。余初乘此車。覺其迅速如飛。不半點鐘。卽到西汗不司奪 West Hamp-
stead 已由高君代覓一寓。距監督處公所不遠。以便辦理交代事宜。此寓係暫時賃居。高君
云。俟彼交代清楚赴比國。卽將舊有之監督處之房退出。由余承租。查高君係與使館三等參
贊桂植君號東原同居也。

十一日

早起卽赴中國使館。往謁李伯行欽差。使館坐落英倫有名之街。名 Portland Place 蒲托蘭
奪卜雷司四十九號門牌。如寫信寄中國使館。應如下之英文式。 Chinese Legation, 49, Port-
land Place, London 此使館樓上第三層右邊一間。卽當日拘留孫逸仙後經英國干涉放出
之地也。中國在各國之使館。聞以此館爲最大。復經李伯行欽差咨請政府撥款。以按年攤還
之法。大加修理。裝飾甚精。余入館。卽有洋僕導余見李欽差。李公詢問帶有書記人員否。余曰
未。李公曰。彼此同鄉。故以實告。監督處之事最難辦。爲何就此差也。然既來之。且安之。如無書

記員。余當薦一二人以助之。余曰承盛意甚感。惟高前監督已薦原僱之書記員。擬不更張。以資熟手。李公又曰。此間學生品類不齊。當留心對付云云。余回憶出都時。面謁新任駐奧沈欽差研喬。沈公云。中國內政外交雖難。然尙可以設法辦理。惟游學監督處之事。實屬難辦。沈公在外有年。深知此等情形。故發言如是。今李公亦云難辦。二公之言。如出一轍。當不我欺。但余惟有開誠布公以應付之。竭力盡心以調護之。以觀將來可耳。查歐洲自有游學生監督以來。初次爲蒯理卿先生。因事難辦。年餘卽辭差返國。代理者爲刁君成章。未半年亦去。繼之者爲高君匡生。又未一年。亦不欲兼理。（高君原係駐比游學監督。兼代英國游學監督）詳部辭職。良以英國游學生人數較多。當時英國有游學官費生百三十餘人。法比二國不過四五十人。德奧不過二三十人。合之尙不及英國學生人數之多。人數旣多。品類因之不齊。亦自然之理。其難辦亦由是也。

按草此日記時。余亦不知余能在英久暫。只有盡心竭力以從事耳。自西歷一千九百十年至英。至一千九百十三年因奉部令裁撤歐洲游學生監督處。余始奉命返國。在英共計首尾四年。爲有游學生監督以來。惟余在英最久也。故附記之。一千九百十三年三月補記。

十二日

是日高前兼監督交卸。將文卷帳目等事移交前來。查學生欠款達千餘鎊。(合華幣萬餘元)深爲駭異。據高監督云。此事並不爲奇。英國每年十月爲開學之期。學生須繳全年學費三十鎊至五十鎊不等。習法律政治者學費少。習工程醫科者學費多。然學生往往藉繳學費爲名。欲圖多領。以爲他項之用。然後按月由學費中扣還。如欠五十鎊者。月扣五六鎊。欠三十鎊者。月扣三四鎊。必半年後始能扣清。此項代繳學費。每年皆由監督處在銀行設法借出支付云。余詢高君每月學費如何發法。高君云前聞新任監督將至。是以將十二月學費先行發出。繼續發之。可由明年(一千九百十一年)一月一號起。雖由一月一號起。必須於本年十二月底發出。學費均用支票。每名每月十六鎊。如有欠款者。可扣若干。所有學生姓名住址。另有一冊。按照此冊填寫。由郵局寄去。均須掛號。以昭慎重。英國學生一百三十名。每月約發學費二千零八十鎊。(合華幣貳萬零八百元)其他支借學費。取領川資。尙不在內。設各部各省學費按期而至。事尙不難。萬一不至。則無米之炊。頗難着手。刻下各省學費往往不能按期匯寄。此間學生至期必須領費。如遲一日不到。則函電交催。迫於星火。不諒辦事人之苦衷。反出惡言以

相加。甚至偶因學費不至。與監督處大鬧。前次監督因此項問題。頗有難於解決之勢。各省可以欠監督處之款。雖去函電。置而不理。監督處若欠學生學費。稍遲即不相諒。每月如此之鉅款。監督何能一一措墊。此中困難。不言而喻。學生中尤有不近人情者。除發學費外。尚有向監督處支借者。不借則彼措種種之言詞。或託疾病。或架言購參考書。動以監督處不調護學生爲失職。借則又不欲速還。一人破例。大衆效尤。借此不借彼。則言不公。若人人借之。每月應付之學費。尙難措出。焉有此鉅款借出。以應彼等無厭之求。種種困難。罄竹難書。此不過道其大概。將來足下親自領略。必自知也。云云。余當聽高君言論。始知李沈二公所言更不我欺也。近年來我國需才孔亟。故不惜巨資。遣派學生出洋游學。然既經派出。各省自應妥籌學費。按期匯至。不可使監督處爲難。學生等身在海外。旅費等項。隨時亦應繳納。否則人不我容。（聞學生如欠房東房火至兩星期者。即被逐去。）堂堂大國。將來視此等學生爲人才。又豈可令人賤視。致下逐客之令也。學費至期無款可發。其咎固不在監督處。然監督有籌畫之責。自當先期與各部各省熟商。切懇按期照匯。高君又云。無如各部各省不聽。吾輩則計窮耳。余亦爲之浩歎。余詢問各部各省學生人數。高君云。各部各省人數不能一定。譬如江寧原有學生十名。


今有一名畢業回國。則只有九名。明年再回國一名。則餘八名。各省往往出缺不補。以省經費。余聞之甚不以爲然。國家待人才而理。今不在他種不急之務而節省之。竟惜培植人才之費。而在此區區教育費中求節儉。實非治國之道。當此五洲互闢。萬國梯航。習人之長。補我之短。欲求競爭。必先學識。今人才不日求加多。反愈趨愈少。出缺不補。決非所宜。余旣來此督學。此節容日當詳請學部。通咨各省。推廣名額。卽以本省經費爲難。亦應以現有人數爲定。出缺應令自費。生充補。以期人數不致減少。而人才日衆。國本斯固。余當視爲急務也。

十三日

高前兼監督。與余結算交代。不獨監督處無分文存款。反欠高君千餘鎊。因彼代墊學費。今彼交卸回比。自應將款付還。余設非所帶川資尙有數鎊。得以支持旅費。否則將如在陳矣。焉有款還彼。高君云。可同到華比銀行商明。暫借若干。俟各省學費到日。再行付還。當可照行。是日同高君赴該行。再三商之。該行因希望將來交易起見。慨然照行。簽字付款。於是到差未三日。則挺身登債台矣。余見此情形。誠不以學部有此監督處爲然。不如早日裁去。免代各省負責。各省以爲有監督處。必事事代爲設法。決不致使學生等受困。往往不甚措意。卽有款時。亦延

不匯寄。今學部竟以監督一人負此重責。不啻置之危境。令其自受困苦。此高君之所以辭差。各監督不能久任。良由此也。余思自束髮受書以來。屢荷國家培養。不應知難而退。無論如何爲難。必求進行。學部既派余來此。苟至爲難之時。自當電請部示辦理。余在此無款可辦。卽再易他人前來。亦必如之。徒滋紛擾耳。余一面清理文牘。一面分電各部各省。迅速匯款。如再延不匯來。本監督不能負責。痛切言之。并另電學部。請再通電各省。迅速匯費。雙方進行。連日發電至十餘起之多。并通知各學生接差日期。隨籌畫發給正月分學費之法。自此以後。終日勞形案牘。注意簿記。日記遂因之中止。雖以後不能按日記載。然有特別之事。仍擬隨時記之也。

環球日記



環球日記

游美日記

駐歐各游學生監督處。奉 部令裁撤。余遂將經營學務事宜。交代清楚。遵令回國報告。他國監督多取道西比利亞。余因歐洲學制。曾經考查。茲擬繞道美國日本。稍事調查。以資比較。遂於一千九百十三年四月二號。由倫敦滑鐵蘆 Waterloo 車站起程。八點五十五分鐘開車。直赴稍曾不吞 Southampton。余乘頭等車。是日駐英劉葆森公使。及館員。駐外財政員。游學生等。均至車站送行。劉公使向余云。同舟而來。君獨先返。此心不能無戚戚也。此去美洲。吸新大陸之空氣。將來學制考查有得。於祖國教育前途。定有裨益。遂在車站手書數字。介紹馬克 Mac 君。囑其於余到紐約時。招待一切。余之頭等車座。係二九四號。先飭人將行李放好。然後與送行人一一握手。正在不忍分別時。車即開。幸同車有三美國婦人挽余手。始得登車。否則幾誤車。以後凡上車須早五分鐘。不可太遲。致誤行期。切記爲要。公使等猶脫帽致送。待車去不見而後行。余亦歸座位。十一點到稍曾不吞即上船。船名阿能比克 Olympic。載重四萬五千餘噸。爲世界最大之船。搭客五千人。將到船邊。即有身披該船號衣。左手上有記號之人。在

此伺迎。余即將手提之包裹四件交彼。余攜一小皮包上船。尋庫克司（通濟隆）所定之艙位。即D號。號中已有一人。又太小。向帳房Purser言之。隨改爲B號。然亦太黑不適宜。旋又向帳房言之。據云須候至君司唐 Queen's town 如無搭船之客。可以代尋一艙位。十一點十分開船。風平浪靜。天氣晴和。船中無事。遂書各信。致謝送行之人。因船過君司唐以後。遂無停處。有信不能發。必待至紐約也。

三號

早九點。船到君司唐停泊數時。帳房云有艙位 First 無人。係在外邊。可以開窗見海。內有三床。極潔淨適宜。與洗澡房出恭所均近。余每晨洗海水澡一次。身體頗好。是日亦風平浪靜。看三等搭客跳舞。然不便下去。有門阻止也。二等搭客欲上頭等。亦不准行。

四號

是日船稍動。然亦稱平靜。晚八點五十分。有楊君 C.C. Young 演說俄國及中亞細亞情形。并將俄國衣服皮貨出示大衆。以徵其曾游歷俄國內地也。

五號

下午大風暴雨。船動不止。因船大尙不致十分搖播。仍覺無事。五號晚餐。余在房食鷄粥。頗合口。是日船上發一傳單。囑每人填寫姓名及船名。所帶包裹是否有貨物在內。有無出售性質。如有個人應用之物。實無出售性質。應填明 Personal Effect 余照填簽名。交藏書處茶房收去。

六號

晨起赴飯廳早餐。余三四五號等日。早餐均未上飯廳。因貪眠起遲也。是日早餐。覺菜品均適口。回憶余前由上海至倫敦。船中招待不甚周到。此次招待。較前優美多矣。行路不可多帶物件。愈少愈好。船上有椅子可租。由倫敦至紐約係美金一元。（約英錢四先二便）洋氈亦係一元。然洋氈自帶爲好。蓋火車中亦須用之。天寒尤不可少之物也。但信封信紙不必帶。船中均備。客棧亦同。阿能比克 Olympic 船二等艙位。晚餐不必着禮服。甚爲方便。故圖省事者。無不搭二等。其價值較頭等廉一半。由英倫至紐約。頭等二十六鎊。二等十三鎊。其船位。書室。（在此寫字讀書）烟室。均不惡。亦可上外邊觀覽海上風景。二等占三層地位。音樂俱全。查由英倫至梢曾不吞 Southampton 頭等火車。由梢曾不吞至紐約頭等船。由紐約至舊金山頭等

火車。(睡車及火食不在內)由舊金山至上海頭等船。(乃路或日本丸) Intermediates.S. Nile, Nippon Maru 各項約八十四磅十先令。如由舊金山至上海乘蒙古滿洲等船。則價又須多加。所有車船費。可以在庫克司一併付之。到一處僅換車船票可耳。不再出費。

七號

是日舟搖動。下午帳房令搭客各聲明事由。填寫登岸票 Landing Cards 逐一查問。始發之。如無此票。則不能登岸。從美例也。晚八點四十五分。在船中開跳舞會。各出五本土。藉以助興。

八號

是日天氣晴和。上午十一點鐘。有跳舞競走等事。七號十二點鐘。至八號十二點鐘。船行五百五十九英里。

九號

八號夕約十二點。船抵紐約 New York 港口。是晚八點。船主已通告搭客。將重大行李收拾妥當。夜間。茶房即運送至船邊。以免次晨忙碌。九號七點早膳後。(較早於平時)即運送小件行李。可交茶房代送。各行李上須貼船上所給之封條。(可向索之)係何姓。即用第一字爲記。

(譬如錢字英文首一字。卽爲C。)以便運至船塢時。物主可以查取。船塢分A.B.C.D.等二十六英字。如係何姓。自知係何英字起首。卽可到何字地位。查取自己之物。頭等歸頭等。二等歸二等。三等另在一處。早膳後卽請各客到飯廳門外。聽候醫生查驗。如有病。卽不能登岸。二等客先查。先查尤嚴。二等頭等稍加查問。卽了事。蓋二等多係下等工人也。當查驗時。茶房先請美國國民。American Citizen 次請各外國人。(英法德等)余亦循例立於門外。美國國民驗畢。(不過大致一看)稅關委員卽首先請余敘話。並未赴醫生處查驗。委員云。敝關已接奉美政府來電。及駐英美大使來信。知足下到此。特表歡迎。並將各電信示余。非常優待。並將余登岸票蓋印。關員卽伴余登岸。各搭客見關員如此優待。多注目視之。先是余未行以前。蒙劉公使電致駐美張公使。轉達駐紐約領事招待。并由駐英美國代辦大使。函電分達美政府及紐約稅關。飭關員招待。是以余到紐約不獨無留難之事。并承關員特別優待。余一登岸。卽有中
國領事館洋員馬克 Mac 君等來接。該洋員伴余至C字處。查取行李。關員見余箱到。卽貼上已驗過印條。并未開看。卽飭運送夫代余將行李運送到站邊。表示優待之意。遂乘汽車至客棧。車費美金一元五角。(紐約汽車貴於各國。)住 Marltharta Hotel 旅館。每日美金二元。

(即六元餘)飯食不在內。且無洗澡房。余放好物件。卽赴領事館。拜會梁領事桂山。陸副領事明秋。暢談一切。將車票交洋員代換。遂與陸領事至中國飯館。(名一洞天)午膳之後。陸君與余至魚池。距領館甚近。見各種名魚。族類甚多。奇形怪狀。不一而足。多有未曾見者。旋往觀葛拿司吞 Gleson 紀念碑。此碑傍山臨河。巍峨壯觀。葛氏調和南北。停止戰爭。有功之人也。建立碑坊。永存紀念。傳云葛氏最信服合肥李鴻章。而李氏遂與之爲至友。光緒二十三年。李氏赴美。葛氏已故。李氏植樹二株於葛氏紀功坊後。并手撰石碑。(漢文)以示紀念。坊在黑得孫 Hudson 河邊。美國偉人以調和南北。而得中國李氏爲植樹。今中國有偉人以調和南北。而不知得美國何人於數十年後爲我偉人以植樹。美由南北調和後。國勢日強。中國由南北調和後。民國始固。各國未承認中國。而美國擬首先爲之。追古論今。知中美感情之厚。有由來矣。美洲各埠華僑。以李鴻章雜碎爲業者。每年所得不下數百萬金。美國人之隆重李氏。可想而知矣。余與陸君赴哥倫比亞 Columbia 大學訪朱君。因朱君外出。遂見中國各留學生而別。八點半赴黑得孫 Hudson 戲園。此園爲世界之最大者。可容五千人。戲亦雅致可觀。惟不如英法之美備。十一點回寓。卽打電話詢朱君。渠云次晨早十點至寓。同赴大學校參觀。晚間余赴

各處游覽。無甚奇景可觀。遂歸寢。

按華人在美國開設雜碎館者。到處皆有。以紐約爲最多。達一百餘家。以市卡咕資本爲最大。一雜碎館資本有達美金十萬元以上者。其他華盛頓 京都 舊金山 大埠亦多操此業。此等雜碎名之曰李鴻章雜碎。考其歷史。當日李氏赴美。供應者頗厚。珍肴百味。無不從豐。李氏頗以爲苦。遂令廚工另作小菜。以雞什肉丁。芹芽。菜心。冬筍。蘑菇等等。合而爲一。幾成爲所謂十樣景也。李氏遂樂用之。西人故名之曰李鴻章雜碎。此命名之所由來也。自是以後。無人不欲一嘗口味。故雜碎館得以發達。至今不衰。查此等雜碎。誠不足稱爲佳肴。而美國人趨之若鶩。足見慕名之心重耳。

十號

晨起寫信寄交美國俄海 Ohio 省大教授桑浩德君。少焉朱君至寓。卽同赴旅順樓午膳。膳畢。赴哥倫比亞大學校參觀。先見該校校長。談及調查學務事件。彼給余章程數種。并由該校教員導觀各種精美礦物。哥倫比亞大學。以礦學著名。該校有學生四千人。中國游學生合官私費生計之。約七十人。下午四點赴紐約教育部參觀。見其規模宏大。余見該部監督。渠云

美國教育。中央不操大權。均由地方自辦。故各地方均設立教育部。教育經費。亦均由地方自籌。蓋一地方無不欲本地方出人才。既欲出人才。則必擴充教育。培養人才。故籌學堂經費較易等語。查歐美風氣相同。多願將個人遺產充地方教育經費。但中國與他國情形迥異。每因地方經費難籌。以致教育不能發達。且當事者又視教育爲緩圖。如中央不握全權。以督催資助之。則教育更難望發達。余參觀該教育部。見其分科辦事。人員有四百餘名之多。每年各項教育經費。開支在三四百萬元以上。以紐約一埠。幾較我全國教育部爲宏大。人才輩出。有由來矣。該部監督。給余建築學校各圖畫。云興學堂。極重要者爲校舍。中國欲興教育。當採取美國極新式建築法。於衛生光線最合宜。（余另調查學制之件不在記事之內）詳查美國教育制度。純由地方自治。故易收普及之效。女子教育尤爲發達。爲歐洲各國所不及。每一處大學生徒。往往女多於男。美國女子能得選舉權。已有數省。實由女子教育發達之所致也。非他教育未發達之國。即欲先爭此權可比耳。余同朱君送圖畫至寓。即至旅順樓赴梁領事之約。在座有商會楊總理與陸沈二君。飯畢回寓。朱君云。次日上課。不克前來。約禮拜六上午十一點同赴他學堂參觀。余夜間赴街市一遊。雖覺繁盛。然無奇景可觀。

十一號

早赴領事館辭行。余與馬克君同到公司換票。票交馬克君即回寓。旋赴紐約博物院。見名品極多。就中有摩根氏一部分。專陳設中國有名之古董。及乾嘉之名瓷。皆前清大內之物。以金枝玉葉爲至寶。珊瑚水晶爲奇珍。誠空前絕後之美品。皆由摩根氏於庚子拳匪亂時。以廉價得之於大內者。此中國一部分。計值美金七十八萬五千元。合華幣一百五十七萬元有奇。其實值之價。當尤不止此數矣。他部分中。另有中國舊式地氈一張。計值美金五千元。亦前清大內之物。人多不得而見之。不知何時流至外洋。供世界之觀覽。中國若不早立博物院。以保存原有之古物。恐百數年後。盡爲他國所有也。又在該博物院中見摩根氏之油畫像。摩根氏人稱爲美國金錢大王者也。本年（一九一三年）三月三十一日死於羅馬。四月十二日靈柩抵紐約。將其所搜羅之法國名畫。盡運至紐約博物院。誠爲壯觀。下午四點赴華商公會之約。該會楊總理邀請參觀紐約華僑學堂。學生計有七十名。各商董學務董事李楊等諸君均隨行。梁陸二領事及沈君亦同至。該校分爲初等小學及高等小學兩班。男女生同課。課程悉照部章。教員係程區二君。程君乃京師大學派出之學生。公請余至講臺。學生就座。先由堂長報告。

學校情形。旋由教員區公沛君宣布大意。請余演說。余演說之大意。以華僑子弟在外。已多有世界眼光。如能再加以中學。必有大用。至請學部撥款補助一事。亦當代爲轉陳。但新中國尙幼稚。不能不公同贊助。望各存愛祖國之心。並勸商董將該學堂勉力維持。區君代爲譯出廣東語。告諸學生。領事梁君等亦相繼演說。演說畢。學生唱國歌。復行致敬禮。禮畢。赴公宴。到者有數十人之多。楊總理又請余演說。並宣布歡迎之意。余言前在學部。卽聞紐約有華僑學堂。辦理得法。名譽甚好。然未之見。今見之果不虛。余在英三四年。歐洲各學堂。均已參觀。此次回國。特繞道美國。考查美國學制。華僑諸君。多提倡教育。領事及商會總理等。又極熱心贊助。將來回國。定當將情形報告教育部。並言道謝之意。梁領事及程區二君均演說。客盡歡而散。旋同程君往哥倫比亞看同學陳湛二君。坐片時回寓。發電報通知雷君孝敏將往美京。聞程君云雷君在美京使署也。

十二號

早起送書四包。郵局云過重。仍託客棧改包寄至北京教育部。十點鐘回寓。程君亦到。十點半至車站。馬克君將車票等交余。又買坐位票一張。(美金一元半)程馬二君送余上車而後行。

行李交車站帶至華盛頓下午四點二十分到美京。是日車上坐位甚好。下車有戴紅帽者代查取行李。送至車站旁。付酒資二毫。遂僱汽車（車費美金一元五角）於五點鐘至兒拿蓮旅館。Raleigh Hotel 住五二三號房間。每天美金三元。而無浴室。是日未見雷君來棧。即打電話通知駐美游學生監督黃君佐廷。黃君住哥倫比亞街。即僱車至黃寓。黃君留飯。同坐有張參贊康仁。粵人也。（此君後代辦公使。解任後。往卜技利。余在金山時常見之。）

十三號（禮拜日）

黃君佐廷約坐汽車。游各處名勝。是日大雨淋漓。冒雨游美京後山。山中有小溪。雨後山洪陡發。頗有流水清音之雅致。夾岸古樹森森。泉林若此。令人心曠神怡。天然勝景。較勝繁市百倍也。少焉赴九街旅順樓午飯。旋與黃君佐廷參觀美國議會。該議會分爲兩部。即參議院與衆議院也。參議院議員二百人。衆議院議員四百人。半年議事。半年散歸。兩院開會時。准報館派人在院記載逐日所議之事。至各省地方之事。由各省自主之。惟關於外交兵備及重大之事。歸總統主之。總統四年一任。得連任。退位後。依然與齊民齒也。余於美國憲法。平日亦稍有研究。而此次赴美。尤加意查詢。美之選舉。雖亦分黨派。然皆以國家爲前提。待總統舉定後。各黨

亦皆服從命令。如本年三月四日選舉總統。前總統達父托即獲二省之同意。得八票。羅斯福獲六省之同意。約得八十票。威遜遜獲四十省之同意。約得五百六十票。威遜遜被舉總統後。則羅斯福退而爲紐約世界報主筆。達父托退而爲液祿大學教授。一則開通民智。一則陶育國民。在朝在野。各盡其天職。不聞有事後之暗潮。及黨爭之私見。國家鞏固。良有以也。某大學憲法教授與余敘及。美國近有人倡議將來選舉總統。寧可多假以年限。如四年則改爲六年。或八年。不可有連任之制。如總統可以連任一次。彼無不存連任之心。故於其任內各處要津。皆將位置私人。以爲連任之助。如不連任。則無此弊。如總統不得其人。連任必非國民之福。並云吾美憲法。有劾總統之條。下院爲起訴。上院爲裁判。得上院三分之二同意。則可去不良之總統。另舉新總統。美憲法問題頗繁。非一二言可盡。查閱美國憲法制度。則可知其詳矣。余又詢問該教授。美國選舉事宜。據云美國黨派。以民主共和進步三黨爲最有勢力。其選舉之法。先之以省分。次之以人丁。如 Ohio 俄海俄省人丁。以每十五萬一千人。當選一名。該省計應得二十五名。爲衆議院議員。各省人丁則有多寡之不同。惟每省不論大小。人丁多少。皆得選參議院議員二名。俄海俄得衆議院議員二十五名。加參議院二名。共應得二十七名。某黨即

授意何人爲總統。此二十七名中。不得有一人選舉他人爲總統。至所被選者。皆係本黨之人。亦決無選他黨人之理。此二十七人被選後。卽到該省選舉總統也。

十四號

是日到使館見張代表。及各館員。與張代表談及承認中華民國問題。云不日可以實行。下午兩點鐘鍾君來約赴各處游覽。并參觀中學校。法律學校。華盛頓大學 George Washington 六點鐘至飯館晚餐。後同某君赴幽雅地方數處一行。

十五號

鍾君來言。今日赴總統府見國務卿。余卽僱車前往。暢談一切。握手辭出。華盛頓街道潔淨。爲世界冠。各街道均寬大而有樹木。一望蔥翠。如入柳陰。十六街。余至時。改爲總統街。樹木森森。尤爲潔淨幽雅。余至白宮（總統府）見其辦事處。并不寬大。惟其四面皆圍亭。環以清流。蔭以佳木。花草繁盛。四時皆春。有時爲總統茶會之用。白宮之右爲外交部。海陸軍部又切近外交部之左右。財政部在白宮之左。尤爲壯觀。爲各部之冠。十一點半鐘參觀幣制局。美國全國紙幣所從出。見以鋼板鏤絕細花紋及英文字。用各項機器。刷印各種紙幣。每一紙必經數十手。

數十器。而始成之。以杜偽造之弊。紙幣分多種。有一元二元五元十元二十元五十元一百元二百元五百元一千元等。寬約五寸。長約二寸。紙極堅韌。映日作碎冰紋。但常用之紙幣。由一元至一百元。局中所用司事工人。約四千名。女多於男。我國如改良紙幣。美制宜倣也。余在紐約。見紐約某印刷局。所印之中國銀行紙幣甚多。以一國之財政上所用之紙幣。假他人之手印之。非計之得也。十二點赴廣東飯館。與鍾君午飯。回寓候至兩點時。與黃君同赴學部。見其祕書查詢美國各項學制。彼云十日內可以答覆所詢之各項學制問題。交由黃君轉寄。余在街買美國憲法書一冊。Constitution Government of U.S.A. 係現任總統威遜遜所著。六點半至旅順樓。赴黃君約。九點歸寓。發電致市卡哥何君。

十六號

早八點由兒拿蓮旅館動身。至火車站。Union Station 付火車費十三元二角。伺候一元。汽車一元。九點十分開車。未開車以前。早半點。將大件行李點交車站司事。名曰切克。Check (即交付行李代運之意) 至市卡哥 Chicago 車上每日用飯兩次。每次約一元左右。車上菜甚豐滿。美國菜一二樣。即可食飽。多則食不下。且亦多費。晚間由車中伺候放下睡床就寢。睡車

下係坐位。各有號數。買睡車票時。已定明於票上。可以知之。坐位上之懸床放下。可寢二人。惟買票須買下床 Lower berth 不可買上床。Up berth 但有時遇女子於一處。應以下床讓之。自臥上床。以便於女子。且以自便也。是日由華盛頓赴市卡哥見山嶺縱橫。阿樂宋拉 Alt-sora 一帶。並有水池。蓄水養魚。火車行過。曲折如之字形。因山高。大。不便直開山洞。以期省工。直至山頂始開洞穿過。下山卽爲比思伯埠 Pisburg 此埠亦大。爲華盛頓至市卡哥之中心點。於下午六點五十二分到。坐車價一元半。睡車二元半。在該埠晚飯。車停二點鐘之久。余赴街購水果等。藉便游覽。見街甚寬大。站夫早二十分鐘前來知會。領赴十九號車。九點開車。車票已先收去。睡車票俟至市卡哥時始收。車票雖一併收去。然次早發還。至付收條與否。可以聽之。不必小心。車票在自己身上。反不如彼代收穩當。車上管事人可靠之至。晚間放下睡車簾幕。幾似床。寬大適體。內有電燈二盞。有放小物線袋處。睡車上行李不可多帶。稍帶應用之物卽可。其餘行李交行李車。車夫予以銅牌。或票。至達到處取領。穩便之至。以免自己照應。早起在車上吃早餐。點菜隨意。價亦不昂。惟必看時間之多寡。如值時間將下車。則赴棧房用膳。不可誤時爲要。早起車夫（無一人不是黑人）打起簾幕。又如坐位一樣。洗面可至一室。上寫

男子室。Men 內有小便室。便後即可至外間洗手。並預備有乾手巾在焉。萬不可錯入女子室

Women

十七號

早九點到市卡哥余遂僱一車至拿撒尼 La Salle旅館。(黃君佐廷所指定)並赴車站取行李。而行李尚未到。卽先到棧房。將票交棧房代向車站取回。給費二十五仙。駕汽車人因代候行李。亦給二十五仙。則此半元係屬多費。到棧不久。何君卽來棧邀同赴杏芳樓午點。見湯君裔栩。言及買睡車票事。遂赴唐人新街旋同何君赴市卡哥大學 University of Chicago 參觀。并詢取校章。卽見該校總理。云十日內可以答覆余查詢之問題。該大學校學制。頗可觀。此校費去三千五百餘萬元。始有此宏大之規模。校中書記給余各項校章。回棧與何君赴福州樓晚膳。何君已先約商董等作陪。到者有湯君信。譚君慎之。(瓊宴樓主人)所談甚歡。湯君遂面約余次日五點晚飯。并請早至。以便交票與彼代換。湯君等去後。余與何君赴街。以司退托 State Street 大街爲最繁盛。燈火輝煌。如同白晝。游人如鯽。少焉歸寢。棧房甚大。房間亦多。余之房間。連洗澡房在內。每日美金三元。晚發歐陽君信。彼斯時任舊金山中國領事館副領事。

後署理該館總領事。

十八號

早起乘游行車參觀市卡哥之美奇根 Machegon 湖。沿湖一帶風景極佳。天氣不寒。歸無事。卽游市面。見司退托街游人雖多。無非婦女。今日各國大都會。大市鎮。幾成一女子世界。貨品亦投好於女子者爲多。中國商業未發達。固爲憾事。而歐美諸國成此女子世界。以致生計日高。耗費日鉅。當亦爲計學家所宜研究者也。四點三刻。何君到寓。同赴湯君之約。在座有譚慎之。吳藻廷。（湯宅教讀）湯中樵。湯信諸君。湯君子名榮耀亦到。旨酒佳釀。備極豐美。在美國之中國雜碎館。紐約不如華盛頓華盛頓不如市卡哥市卡哥不如舊金山。余此次旅行於外國。得食中國飯。沿途承各華僑招待。極爲周到。湯君等欲送行。余面辭之。何君於下午八點送余赴車站。并給湯君介紹信。承湯君美意。并代電達舊金山歐陽君。湯君乃華僑中有聲望。富而好禮者也。常捐各處水災達數千元。并爲美國車站經理員。八點半由西北車站 North-Western Line 開車。遂與何君握別。九點就寢。甚爲適意。

十九號

早起無事。購車中報紙閱之。午飯十二點半鐘。晚飯六點半鐘。飯廳招待。不甚周到。伺役尙好。是日書日記。車至奇煙雷 Cheyenne 見地有雪。沿途見洪水到處皆是。不知我國政府曾致電美國慰問否。欲聯歡中美。此亦係國際中之要義也。晚八點大雨。

二十號

所經過地方。大半山地。積雪映目。下午三點十分穿一山洞。約五分鐘。在依分吞 Evenston 左右。所經過之山。多係不毛。我國各處之山。多有樹木。果能多築鐵路。則較美爲好。余游遍大地。未有見天然出產如中國之富者。余望我國人將此大好河山。協力保守。勿爲強鄰分割。則馨香以祝矣。在車購沿途風景畫二冊。計洋一元二角。美人做生意甚靈敏。其忠厚老成。遠遜英人。五點二十五分發電致歐陽君。過哦葛登 Ogden 以後。取時計觀之。時間即改遲一點鐘。未至哦葛登係六點鐘。至哦葛登以後。即爲五點鐘。哦葛登山水環繞。中有太平原。當爲富庶之區也。哦葛登過去數分鐘。即爲大鹽湖。Salt Lake 車過此湖。約一點十分鐘。分爲兩段。中間似較我國黃河面爲寬。惟工程較易。湖中有小島。星羅棋布。哦葛登左近之形勢。極具天然之雅致。頗爲壯觀。

二十一號

早飯後。車過裴克 Phicke 地方以後。車行山谷中。旋轉自如。見峯巒疊疊。積雪盈盈。山景如畫。莫可比擬。上午十點半至下午三點半。車行木架中。蓋山高積雪。用木架以排去之。免車行不便。工程極大。車至山頂。幾如之字形。寧可曲折。不直開礮。以免費工。此講求工程學者。極宜注意。是日見山色青葱。古樹森森。火車枕木。多取材於此。山頂有汪浩思湖 Wond House 甚大。魚亦夥。建有棧房。以備暑日歇夏之用。山中有一中國村。中國人專以淘金爲業。聞有某甲乙丙丁四中國人。某年夏日。在此淘金。得二十八萬美元。約合中幣五十六萬元。刻尙有中國人在此淘金。然富者已去矣。現所淘得之金不多。並有中國人在山中開闢菜園。廣種蔬菜。運銷他埠。亦獲大利。車行各處。地方均靜雅。令人不忍舍去。較昨日所行各處。地多荒涼不毛者。高出萬萬矣。美人能於山頂行車。極爲靈巧。中國多山。亦宜仿行。惟車輛限定十二駕。不能過多。多則不便。因山高之故耳。在山頂行車。得以高瞻遠矚。誠大觀也。車至嘉省 California 後。林木遍地。菓樹極多。幾無一處不佳。是日過山洞四處。惟甚小。因車行高山。所必須開洞者無多。即開亦不甚長。省費實多矣。

美人於高山接水至各處淘金。或以水力爲各種機汽之助。山中稍有平原。即有人住。余至此不覺心曠神怡。爲余極得意之事。在華盛頓同黃君坐汽車游於山谷中。見林木森森。河水盈盈。并此爲此次游美之二大快事。山中各處均植菓樹。興利尤多。車過司托克登 Stockton 車用舟渡者十五英里。火車以舟渡。第一次見之。火車行抵屋倫 Oakland 車站則止矣。有站役戴紅帽者。將行李用小車載赴渡船中。行人應記其戴紅帽者之號數。便於找尋自己之行李。火車上之伺役。由市卡哥至舊金山給予酒錢美金二元可也。渡船過海須三十分鐘抵三藩市。即舊金山。San Francisco 戴紅帽者。將行李運至岸上。停止大樓下。舊金山領事歐陽如山君。帶同遠東旅館主人黃綏章君來接。因先期接有湯君來電故耳。遂僱一汽車至其棧中。給汽車費美金一元半。到棧休息片時。總領事黎藻泉榮耀。即來招待。略談即辭。余浴後即發湯何二君信。道謝在市卡哥之優待也。連日車中震蕩。殊覺困倦。因而早寢。

二十二號

是日黎藻泉譚毅侯沈子英諸君。均來招待。歐陽君因赴船接游美湖南學生沈寶善（駐美監督處書記）等。無暇前來。余遂與黃君之子坐游覽車。Sight Seeing Car 游覽各名勝。尤

以金門花園爲第一。舊金山山水甚佳。天氣及地方亦淨潔可觀。紐約市卡哥過於繁盛。以幽雅論。該二處實不及舊金山也。下午四點半回寓。見各報載余到埠考查學制。午後歐陽君導余參觀各女學校。係美教士所設。校生皆係華僑女子。頗多聰秀者。學制亦整齊可觀。小女生作歌。以表示歡迎。

是日游金門花園。并就近赴太平洋巴拿馬萬國博覽會場一游。以開眼界。查該會總理爲莫爾 C.C. Moore 總監督爲司克父 Skiff。該會於一千九百十一年二月八日。上院議定以舊金山之金門花園爲會場。由前總統他父托批准。於是年十月十四日開工。一千九百十二年二月二日。由前總統邀請各國與會。會場共計六百二十五英畝。會場大段落分爲十三處。(一)美術館。(二)教育館。(三)製造館。(四)工藝館。(五)文藝館。(六)機器館。(七)礦質冶金館。(八)交通館。(九)園藝館。(十)社會經濟館。(十一)食品館。(十二)農業館。(十三)典禮院。會場中以三十七英畝爲外國建築所之用。該會擬於一千九百十五年二月二十日開會。於是年十二月四號閉會。我國本以農立國。應派專員與會。考查各國農業。以爲改良之助。中國出產以絲茶瓷器爲大宗。近年來幾爲某國所奪。余深望各華商及各團體。組織公司。收聚精良

之上品。請工商部與會。早日選定會場地點。以便與賽。俾華貨可以暢銷於各國。大利或有挽回之望。

二十三號

早同歐陽君赴舊金山學部。見該部監督。談及事務。關於調查學制各問題。彼可日內答覆。至關於大學之件。應往嘉省大學調查。余遂同歐陽君赴卜枝利 Berkely 見嘉尼佛里大學校校長。參觀一切。并見中文大教授傅蘭雅博士。Dr. Fryer 此老年近古稀。在中國三十五年。官話甚好。卜枝利地方背山臨海。極爲幽雅。古樹名花。頗具美觀。其中有一著名之演說臺。以石爲之。可坐五千人。該大學有生徒四千餘人。男女生徒皆同校而分室。聞陳錦濤王寵惠等博士。均在該大學畢業。美國大學甚多。而哥倫比亞大學。市卡哥大學。嘉尼佛里大學。均係卓卓有聲者。余同歐陽君坐於森林之下。頗爲心曠神怡。歐陽君原在該大學校上課。力勸余至舊金山就差。亦可在该校就學。余第二次至美。當以此時爲嚆矢也。

二十四號

歐陽君來約余參觀中國男女生在美國之學堂。此學堂亦專課華生。蓋華僑每人每年捐洋

貳元。爲教育經費。始本同美人同授。後因不便。卽與美人分授。專教華生。有甲乙丙三級。男女分室。惟有一二處男女合授。不甚整齊也。據校長云。年大之生。男女生應分校。蓋彼等間有操中語者。校長不能知之。恐有不合。校員甚以此爲慮云。茲將該校中授課良法列下。

(一)懸黑板於牆四周。令學生作文於其上。教習改正之。使諸學生得以共見。較紙上改正。他人不得見爲優美也。

(二)問答各生功課。無一可免。

(三)美校教習多以女子充之。蓋其專一心志於教育也。

午膳後。卽赴陸軍學校。Military School 該校距舊金山稍遠。乘船約四十分鐘。地方亦靜潔可觀。該校有中國廚工某送冰極令爲余等作午點。行入山中。見花木森森。實屬天然幽雅之處。聞此間有中國學生。半日作工(洗學校)半日讀書者。較領官費而不讀書。其相去不可以道里計。美國學風純正。專求實用。非他國所能及也。

二十五號

歐陽君黎君均來會晤。余卽辭行并致謝。余與歐陽君早餐。彼給余介紹信三封。飯後卽僱車

赴乃樂 Nauro 船。汽車費一元半。給提包人五毛。上船至三十六號房間。少焉黎譚沈三君均上船送行。一點鐘開駛。未駛前歐陽君領余赴上船處書名。（卽稅關所設考查出口人數注册處）此船太小。僅容五千噸。振動不已。下次似不可再搭。午后三點船主請交船票。定餐房坐位。此次搭客僅十七人。爲極少之數也。

二十六號

天小雨。船大動。終日思眠。因多日在各處奔馳。亦藉此靜養也。

二十七號

天稍晴。船亦平。與船役商定。晚七點食中餐。彼云無小菜。遂令買臘腸一捲。價半元。土齡魚半元。彼照應尙周到。設不先招呼。不能如是也。晚有日本船一艘過去。衆人以手巾應之。西人送行。朋友乘船或車開行時。均以手巾搖送之。以表示其歡送誠意也。

二十八號

天晴。早起見大衆打球。余亦隨之。音樂并作。船上設有冷水浴池。係由海中吸起之水。味鹹。令衆人赴浴。余不欲爲之。因太冷也。余租坐椅 Chair 一張。出洋一元。乘海船應常坐船面。空氣

較好。如常在艙內。必覺困倦。故坐椅萬不可少。有時人多自帶。亦甚方便。余起較早。見船中發電。唧唧之聲大震於耳。卽無線電也。

二十九號

天氣晴和。行人仍打球。晚八點半復作音樂。二美婦操之。船客皆環聽。午飯與船中大副談及中國改革之事。彼云不過改一共和之名及去一髮辮耳。余與之爭頗劇。然觀我國現下情形。實不能無疵也。

三十號

自舊金山至此。逐日鐘點不同。每日快半點鐘。以後仍如此也。午飯後船中大副談及在美之中國堂號人。野蠻性成。常殺本國同胞。頗非之。彼不知當日出洋者。皆係水手工人。毫無教育。上等人近年始有出洋者。該大副以工人水手爲中國人代表。未免誤會。然此等工人水手。刻多成爲商人。惟不注重教育。及國語統一。若令其改良一切。殊非易易耳。

五月一號

是日因舟將抵檀香山有傳單云。洗衣者須填單。於抵岸送去。此地洗衣昂貴。晚八點半有跳

舞會。懸燈旗。余因早眠。以便早起。故未與會。告白有云。二號上午五點三十分到埠。擬俟船抵埠。即可登岸。盡一日之游。

二號


晨起。待醫生到船查驗搭客。有無疾病。方可登岸。六點半有小舟載醫生至。并有稅關委員至船。船主令搭客分爲兩處。船左係女。船右係男。醫生驗時。僅令搭客將手同時示之。卽爲驗過。少焉早餐。卽將歐陽君介紹函交卓海君。華人充稅關委員。卽來招待。並帶見摩爾君 Moore (關員洋人) 遂書一紙條。云余係頭等搭客。設在岸有人查問。囑余將此條示之。蓋華人登岸不易也。早餐後。卽令伺候役將房門鎖好。因此地竊賊甚多之故。并將所換衣服填單交送。上岸洗之。余卽與卓海君登岸。關口亦不一問。卓海君代打電話。通知中國領事館。并以專車送余到領事館。車至館。陳領事公陸李通譯嘉樂劉書記重彝均來接晤。少焉劉君重彝卽同余赴魚池一覽。入門費每人二十五仙。池魚不多。遂大雨。雨停稍游一二處卽回館。因陳領事約十二點午飯。余回館時。陳領事正接華盛頓張代表來電。(轉外交部電) 本日美國已承認中華民國。應懸兩國國旗於門首慶祝云云。大家皆甚歡喜。遂令館役將兩國旗升起。美左中右。陳

領事意也。余請陳領事速函告各商界。頃刻各商店均懸五色旗。滿城飛揚。少焉午餐。陳領事云。足下今日剛到。共和卽承認。升旗將以歡迎足下乎。彼此一笑。飯後由劉君介紹。見黃錫五君。此君畢業於美國大學。習政治經濟科。黃君同余等至各處參觀魚市。賣魚者係中日人。共同組織。檀香山華商以米店業爲最發達。(一)爲程水機汽礱坊。其礱坊所用各種機汽。有德有英有美。且含有中國古法者。合各種機汽之法。再加以程君之心裁。每點鐘出米十七包。每包一百磅。穀經過四次不同之機汽而後成米。并可分細米與糠。又有秤米秤。以麻袋盛之。不用人工。所有機汽僅用去美金一萬元。(約中幣二萬元)程君面云。當民國二年共售二十八萬包。除在本埠運銷外。并運至舊金山。年約售五萬包。程君人甚精明。平日頗研究機器之學。并云欲回中國振興實業。惜無人招致耳。(二)馮昆之昇昌公司。(米店)每年售米二十八萬包。每包百磅。價值美幣五六元不等。每年售米約計二百萬元之譜。旋至美國大客棧。登樓四望。風景極佳。又晤商會總理黃亮君。留余住彼處。余辭之。某木器店給余檀香一塊。以示曾到檀香山作爲紀念品。又送木一方。(此間良木極美不用漆可以自亮)劉君並贈余風景圖二冊。黃君又取報紙數分送至船。將上船時。見有賣花者。劉黃二君各買花二串掛余項。此間風

俗皆如此。男女一律。余以爲奇也。將至船。陳領事卓海君等亦來送行。待客行船開。項花始能取下。以示親近。船開時有沒水人多名乞錢。擲錢於水。渠等立即得之。但擲者不多。船五點二十分開。遂告別檀香山矣。

三號

是日天氣酷暑。不能安枕。因近於赤道之故。茲列圖如下。



四號

是日天氣亦酷暑。小雨。由舊金山將到檀香山之兩日。及由檀香山赴橫濱之首三天。甚熱。因此五日船行近赤道之故。每夜見浪花中放出燐火無數。此燐火名 Phosphorescence 此物據舟子云。係下等動物。不易見。必用發光鏡照之。然後始見。此燐火須聚千百 Phos 始成。此物

在大西洋無之。因船行常近寒帶之故。惟在太平洋檀香山左右近於赤道始生之。此乃一天然奇異之物也。

五號

是日大雨。舟行亦稍離熱帶。故熱亦稍減。同舟有名卜電博君。Playbooi言菲里賓島 Manila 中國人有學堂。係美國專爲華僑子弟所設。因收華僑之稅。不能不設學堂以教之。惟分別另設學堂。不與美人同校。以示區別。有華人楊某捐八千元美金助學堂經費。可謂急公好義也。卜雷博君言及英美語言。所以不同之點。蓋在美洲英人甚少。德法俄意各國之人均至此。日久美國語言卽稍變。美語近硬。英語近軟。到美之人。如來時卽陳明願爲美國國民。得有地方官之證狀。過七年後。卽可呈請爲國民。設有於來時不陳請此狀。是不願爲美民可知。故永久不能爲美民。卽如中國人。多不願爲美民。是以中國人在美國有居住至四五十年以上者。仍非美籍。然此亦可見我華人未嘗一日忘祖國也。

六號

天氣溫和。卜雷博君言及嘉省現定新律。限制某國不准在嘉省買田產。其原因因美人性好

逸。喜居城市。鄉間一切工作。俱由某國人爲之。凡拾菓品採棉花。均仗某國人。某國人往往相約於菓熟棉落之時。不作工。以致菓品棉花均落地爲無用。產主因此損失不貲。有產者必以產爲生活。今每年損失如此。產必不保。一經出賣。某國人則以廉價取得之。此等用心。美人頗恨之。故定此律以限制某國人買產。且某國人尙有他種不規則行爲。美人每談及之。多不恰意。美人常以華人爲誠樸。故進口之例。不獨爲華工設。某國工人亦同一律也。聞不准某國人買產例。該省議會尙未頒行。某國已出而反對。美總統已命外交總長赴該省勸其取銷此例。以免引起國際交涉。

(七號)八號

由舊金山檀香山至此。鐘點不同。每日快半點。至此則一日將不同矣。故無七日。只云八日。本爲禮拜三。卽爲禮拜四也。是日午正同舟人合拍一小照。天氣近涼。然不冷。如我國二八月之天氣。舟上無線電不時拍發。收到終未見示人。船中無剃髮匠爲憾。是日天晴微風。海波不興。


九號至十二號

連日在船中無事閱書。並檢點行李。需用者須早日提出。以便到日本時應用。而免臨時匆忙。

十三號

天氣晴利。下午船將近橫濱。見兩邊連山環繞。中開一港。港中有兵艦七艘。羅列口門。氣勢甚雄。港之正中築有一砲台。安置巨炮。爲往來船舶所必經。日本原係島國。必有海軍。始可自強。但我國海口亦多。向無巨艦以固門戶。良可慨也。

環球
日記



環球日記

游日本日記

五月十四號早。乃路船抵橫濱。未登岸之先。有日本醫生到船查驗。船主請搭客先坐在飯廳候之。醫生不過一看而已。少焉有通濟隆 Cook & Son 之夥。來船招待。余當將行李交該夥。令人運至駁船。乃路船上伺役。並不一送行李。爲他船所無。余給賞金至六七元之多。頗不爲少。傳云水手不可先付賞錢。必待其將行李搬送時。再付爲妥。此事行人不可不注意也。登岸後。將行李存放行李處。與該夥同到通濟隆公司。因時間尙早。先理髮。蓋乃路船無理髮店。此船萬不可搭。卽託通濟隆之司事代僱洋車繞橫濱一行。見賣笑人沿途皆是。歌絃之聲。不絕於耳。回到領事館。李家駿君留余午點後。仍回通濟隆取票。蓋先已付費矣。由美到日。欲定回國行期。不可不先到通濟隆聲明。否則恐有誤船期。如乘火車。則可不論。余因欲順道游高麗。及我國萬里長城。又因在舟日久。已覺困倦。遂決定由火車行。多費三十六元。是晚七點三十五分由橫濱起行。先赴東京一游。通濟隆派人送余。行李交付火車寄東京。住竹地靜養軒旅館。Seigokar Hotel 該棧尙好。

十五號

早八點赴使館。見汪代表伯唐。並呈劉代表介紹函。暢談一切。汪代表遂囑林參贊代書介紹信五封。回寓信即送到。

茲將汪公使介紹日本文部省書照錄如下

敬啓者茲有敝國前駐英游學生監督錢文選君由英歸國道出東京欽仰

大名擬訪謁一晤

雅教特專函紹介尙希進而教之爲幸專此敬頌

時祉

中華民國二年五月十五日

汪大燮

又汪公使介紹各大學

校總

長書錄下

敬啓者茲有敝國前駐英游學生監督錢文選君由英歸國道出東京擬赴貴大學參觀用特專函紹介尙希

貴校總長派員詳細指導至爲感紉專此敬頌

時社

中華民國二年五月二十五日

汪大燮

(一) 東京帝國大學總長

櫻井銳二閣下

(二) 東京高等工業學校校長

手島精一殿

(三) 東京高等師範學校校長

嘉納治五郎殿

(四) 早稻田大學校長

高田早苗殿

是日早余僱車先赴文部省。談及調查之事。該部遂將各校課程給余一份。並派員導余赴帝國大學。因新校長尙未到任。遂見該校書記。領余參觀理科。見有湖南學生一人。該大學分爲五科。理商法文醫五高等專門學校。尙稱妥善。但規模不及歐美。儀器亦無多耳。遂赴東京高

等工業學校。校長尙能操英語。適有教員杉山在該處。彼曾在南京高等學校充當教員五年。并能操中語。導觀各處機械。專製洋皂。以挽回利權。因天晚乘車回寓。車夫稍能操英語。可免另僱嚮導人。Ching余常在日本飯館用膳。其俗席地而坐。菜多魚類。美殺甚少。且多甜味。飯館以女子伺候。蓋日人男子工資頗貴。一切小事。多以女子爲之。聞東洋偶有女學堂學生。尙充人下女。（代教日文）每月不過七八元。生活程度甚低。不及歐美遠矣。

十六號

早大雨。僱車至早稻田大學。校長派書記導余至各處參觀。該校分爲四部分。該書記亦曾赴歐美各國調查學務。該校大致可觀。取校章一分而行。少焉至高等師範。校長爲嘉納治五郎。是日不在校。書記不識英文。余與之以中文筆談。嘉納治君余曾在海牙萬國德育大會見過。書記請一教員導余至各處參觀。該校附有中學小學。該校規模尙大。尤可注意者。該校將所有畢業生之相片。懸於牆上。將其姓名及其先後所任各職務。一併注明。俾後來之學生。皆得識之。是亦聯絡同學感情之一大關鍵。否則日久雖係同出於一校。並不知其爲同校之人。爲可憾也。該校所附設之小學。辦理亦好。手工亦間有可觀者。日人風俗。每至一屋。必先去履。然

後登堂。惟着西式鞋者。可套一鞋於外而進。學堂亦然。

十七號

早接董君綬金由西京來電。云十八號何時到京都。彼可赴站迎接。當電覆下午可到。是日天氣晴和。早起乘洋車赴車站。問明換車票及開車時刻之事。遂赴芝公園。上野公園一游。見上野公園遍植櫻花樹。惟時期過。已無櫻花。每年當四月十日至二十日爲櫻花盛時。游人如鯽。此處亦有靜養軒旅館。爲竹地靜養軒之支店。該園內有萬牲園。博物院。院中日本古今名物。間有可取者。另一新院。係瓷器字畫兩種。分中日韓三部分。評論各物。應以中國爲上。日本次之。韓不足論也。由公園赴使館辭行。返芝公園。見有日本孝感廟。廟式皆照中國式樣。僧云此廟約有一千三百年之久。廟僧取錢二十仙。導觀各處。查明治天皇以前。卽係孝感管理。卽日本將軍之類。

十八號

早八點三十分。由東京動身赴京都。下午七點二十分到。董君與其子及某日人來接。下車出門時。據站長云余早動身一日。睡車票須另出三元。此事余已致函通濟隆交涉矣。以後如旅

行。睡車票以臨時買爲妥。庶免吃虧。由站到董宅。約四十五分鐘。董君令其子女出見。因係余舊日之學生也。晚餐畢。促膝暢談。該處頗靜雅。董宅係仿日本式建築。費日幣五千元。地租每月十元。

十九號

早起看山。旋赴羅王二君處。略談。卽赴京都帝國大學參觀。該大學分爲四部。卽文法工醫四科。規模亦甚好。稍遜於東京。日本之大學有三。官立。設於東京西京九州三處。余參觀畢。卽同董君乘車赴嵐山。換小艇泛清溪而上。至溫泉浴身。溫泉在山邊。有浴池。有餐館。頭等約五角。溫泉之水甚好。惟盡以女子伺候。浴堂亦然。蓋其習俗如此也。脫衣於一室。另披一日本衣至池。返而食飯。再穿衣。館菜皆以魚爲之。鮮魚畜養滿池。以供游人之食也。山頂有古廟。設有買明信片者。加以廟印。以爲親到該山。留爲紀念。並有古葛藤根切片出售。日人某作詩送余下山。步行至月橋。橋旁有茶亭。余等飲茶稍息。卽乘電車返董宅。余在董宅照相二打。（計八元八角）係小林照相館來照。京都頗稱名勝。傳云歌館青樓有一千三百餘家。其風俗可見一斑矣。說者謂西京（京都）山水清幽。人物秀麗。較勝東京多多矣。

二十號

是日由京都乘火車起程。前往高麗火車至下關遂換船。乘八點鐘之船。至釜山計一百二十海里。車停約二點鐘。遂由釜山至漢城。由漢城至平壤。再至安東。沿途見高麗山明水秀。土壤肥美。惜農事不講。商業未興。人民相習懶惰。衣食不充。一種苦况。憂形於色。亡國慘痛。能不寒心。

安東設有海關。入口行李。均須檢查。過一橋（鴨綠江）卽爲安東縣。人煙稠密。鴨綠江卽爲中韓交界處。過此橋卽爲中國內地。由安東直達奉天。自釜山至奉天省城。係日本車輛。雖狹小不如歐美。而尙潔淨。伺候亦尙周到。余以將至我國內地。卽不逐日紀事。蓋游歷內地者多。且亦無事可紀也。

余至奉天車站。下車先赴客棧。以電話詢問余之舊日同學朱君子厚。是否在測繪學堂充教習。電答仍在該處。卽來會晤。余與朱君久別。忽得聚首他鄉。歡欣無極。朱君約余至酒館午飯。飯後卽赴該學校暢談離緒。忽聞校外柴廠火起。殃及學校。火已入大廳。所有教員學生。均紛紛搬運行李出校。余亦助朱君搬運。由後牆跳出一場歡聚。忽變愁觀。誠出人意外。祝融氏誠

惡作劇也。少焉將火撲滅。校中人員驚魂甫定。又須搬物入校。紛亂情形。不可言狀。余因欲回京銷差。卽與朱君握別。

余由奉天車站赴山海關。在旅館一宿。奉天至北京本有快車常車之分。快車可以直達北京。勿庸下車。余所以不乘快車者。藉以在山海關游覽長城。余此次不由日本直達上海或天津者。一爲游高麗。一爲覽長城也。中國有三大工程。一長城。二黃河。余不惜金錢與時間。僕僕風塵。奔馳於名山大川。以及各名勝。無非欲覽古蹟。藉作壯游。俾不負此生耳。余次日特至長城一游。長城本說萬里。山海關乃長城之一段。爲最要之處。關上懸有一匾。書天下第一關五大字。書法極爲雄健。當係名家手筆。更上一層。則眼界尤爲空闊。見山海關之縣城。係倚長城而建設者。關外皆係平原。一望無際。登高遠眺。不禁遐思。秦始皇築長城。勞民傷財。古史譏之。而終使匈奴不敢南下。其功未可沒也。俗傳有孟姜女送寒衣。哭倒萬里長城之事。余詢諸土著。有無其事。均云有之。并導余至其處。卽今日火車通過之處耳。惟見土邱一二。別無遺跡。長城破缺之處。見其磚之長寬厚。迥與今日不同。擊之鏗鏘有聲。土著某家藏有長城磚若干方。因余給予嚮導費一元。彼卽欲送磚一方與余。以其太重。故未取也。聞倫敦博物院中。有長城磚

一方。係出費二百元購自中國者。此等磚係秦朝之古物。應令沿長城一帶之地方官。隨時查察。不准人竊取。藉以保存。由山海關開車直達北京。原無可紀之事。惟多年在外。一旦歸至本國。一種歡欣愉快之情。油然而生。故沿途村莊田舍。皆注意觀之。幾以瑞士之風景。巴黎之樓台。不及我萬萬矣。此無他。係一種愛祖國之心所致。並非瑞士巴黎不及此也。

由奉天至北京之車輛不及外國遠矣。尤以廁房在車之外邊爲最危險。見乘車人赴外邊廁房小便。車行必搖動。立足不住。卽跌於車下。大有性命之虞。初由外洋歸國。固甚心樂。然漸入內地。見其事事不如人。又漸心憂。余此次由英繞美日回國。所乘船車。以及招待等事。中國不及日本。日本不及美國。美國不及英國。此亦進化程度之比例耳。余週游全球。不覺其苦。及至本國。見車中招待之欠缺。檢查之煩擾。關役之留難。佚役之訛索。種種不方便之事。發現於目前。令人不能忍受。余常云。願行外國萬里。不願行內地一步。可以深味余言也。當此世界大通。五洲互關。外人游覽中國者。年來頗不乏人。著書立說。痛詆吾國交通上欠缺者。亦屬不少。吾國士大夫。曷不急起圖之。將以前積弊一掃而空。非獨外人不再譏誚。卽國人亦大受其賜矣。到北京以後。諸舊友開會歡迎。囑余將游歷情形略述大概。余曰。頻年來車輪馬足。南北驅馳。

大陸重洋。東西遍歷。在歐數年。暇日亦常赴大陸諸國。考查政治學務。此次奉令回國。係由倫敦西渡。一萬一千餘里之大西洋。乘世界第一大船名無能比克赴美。承駐英劉公使電達駐美張公使。並經駐英美國大使。將余到美日期。報告美政府。故登岸無濡滯之擾。各埠華僑優加招待。有賓至如歸之樂。得美學部之贊助。故學制易於調查。有駐外中國各領事之嚮導。名勝得以暢游。華僑以舊金山紐約爲多。市卡哥次之。華盛頓又次之。以舊金山一處論之。曩者有十萬人。近則不過萬人。良以美國華工禁例太嚴。凡回國者不易再返。（有時因護照手續未完備則須出擔保費五百元美金即中幣一千元）華工前至舊金山原以淘金爲業。今則金罄。又兼大火而後。百物昂貴。謀生不易。故人數日見減少。余由紐約至舊金山計程一萬零八百餘里。復由舊金山渡二萬里之太平洋。東至日本舟。經檀香山余抵埠。甫登領館之堂。即接美國首先承認中華民國之電。（民國二年五月二日）一紙書通告。五色旗飛揚。僑民歡呼。華商慶祝。余適逢其會。尤覺歡悅。華僑或贈余檀香。或送余紫木。爲紀念。查檀香山日本人多於美國人。大有喧賓奪主之勢。我國人在夏威夷（檀香山爲夏威夷首都）等處。共計約二萬。日本人富商亦多。余在日本由汪代表伯唐介紹文部省。及各處大學高等學校。考查事竣。即

繞道高麗返國。回憶余赴英時。由上海而香港而新加坡而檳榔嶼而哥倫布而孟買而印度洋而亞丁而紅海而蘇彝士河而埃及而地中海至英。係由東而西。今由西而東。則繞地球一週。計程九萬里。此余所游歷之大略情形也。

游地球一週里數

人言環游地球一週。計程九萬里。究由何處至何處若干里。多未得其詳。不免令人茫然。余既繞地球一週。特將某處至某處里數。分列於下。

由東而西

上海至香港

八一〇英里

香港至哥倫布

三、〇九六英里

哥倫布至孟買

八七五英里

孟買至蒲寨

三、〇五九英里

蒲寨至倫敦

三、二一五英里

以上共一一、〇五五英里

由西而東

倫敦至紐約

三、三二五英里

紐約至舊金山

三、二七〇英里

舊金山至檀香山

二、〇八〇英里

檀香山至橫濱

三、四四〇英里

橫濱至香港

一、六二〇英里

香港至上海

八一〇英里

輪船向先經香港再至上海

以上共一四、五四五英里

以上由東而西由西而東共二五、六〇〇英里每英里合華里三里又三分三計之共八萬五千二百四十八里。所謂環球九萬里係大概言之耳。

附列辦學文件

請定留英官費學額

爲請定留英官費學額事。竊查各省官費游學額數。曾於光緒三十四年經學部奏准。以現有人數。作爲定額。惟各省間有因經費支絀。遇有缺額。卽行裁撤。亦有須若干缺額。方准補一人者。此間自費生中家寒無力者多。每遇本省官費缺額。莫不引領屬目。爭求頂補。甚有援引奏案。紛紛稟求。難以理喻。且自費生來英時。往往百方告貸。勉強成行。原期考入大學。得補官費。以遂求學之志。卽無缺額。尙有疊次稟請逾格裁成者。今以原有額缺。遽行裁去。羣情缺望。殊難折服。況內地各專門大學尙未設立。勢亦不得不留學外洋。以爲蓄艾。且自費生考入大學者。程度已高。皆係可造之才。再加以數年培植。所學必能致用。當此需才孔亟。雖財力艱難。惟此數名學費。將來收效甚宏。似不宜惜。擬請咨商

學部。申明舊章。卽以原有之官費學額。作爲定額。此項學費。並請

學部奏明。准作正項開支。職爲愛惜人才起見。冒昧瀆陳。是否有當。理合備文申請。憲台鑒核施行。須至詳者。

右

詳

欽差出使英國大臣劉

駐英游學生監督錢文選謹呈

請定留英學生學額始末記

在英中國游學生人數。向無定額。余初到英接差時。聞高前兼監督所云出缺不補之事。以爲非國家廣育人才之道。耿耿於心。思有以補救之。無如初到。內因案牘之紛紜。外值學費之竭蹶。清理籌畫。匝月始有頭緒。回思此事關於人才之進退。未可視爲緩圖。遂將此事面陳劉公使。一面擬稿詳請咨部。轉行各省。略云。文選到英。查知留英學生人數。向無定額。近來各省多以財政困難。往往出缺不補。以現在英國留學生人數百二十餘名計之。卽以每年畢業十餘人歸國。若一律出缺不補。則不及十年。無一官費游學生矣。實非國家培養人才之初意。各省近來雖以財政困難。不能推廣學額。要亦不可減少之。良以國家須人才而後治。方今五洲互關。萬國交通。苟不取人之長。補我之短。不足以自立於競爭之世。且我國財政之困難。由於工藝之不發達。以我國土地之大。人民之多。欲求財政之舒展。正宜多派游學生。分赴各國。專心

研究工藝之學。俾回國後開闢利源。以謀富國之道。而樹強國之基。一省財政之困難。當不在此區區之學費。可否以文選到差之日起。所有各省游學生人數。一律作爲定額。以後出缺卽以此間自費生充補。查學部定章。如自費生能考入大學。習農工格致醫而有成績者。得請本省補給官費。於是各省自費生。盡力自籌。一二年之學費。貿然前來游學。各存考入大學。卽可請給官費之希望。孰意各省游學生回國。出缺不補。一般自費生。大失所望。欲留此。則無力自籌學費。欲返國。則又學廢半途。誠爲可惜。以實在情形論之。官費生缺出。以考入大學之自費生補充。於公家及自費生。兩有裨益。何則。查各省所送之學生來英。其能直接入大學者。固不乏人。其不能直接入大學而尙須在外補習者。亦復不少。今以自費生已入大學者充補。較在外補習之新來學生。自可事半功倍。公家向須出五年學費者。今只須出三年矣。自費生得補官費。免半途輟學。亦自感本省培養之德。將來畢業回國。當樂於効用。自此文去後。學部卽通咨各省。不數月各省督撫。均先後咨復監督處。有准以自費生充補者。奉天等省是也。有爲本省高等學堂畢業生籌出路者。以游學生缺額。須咨明本省。由本省高等學堂畢業生中選派。如山東等省是也。有多認游學生名額。准自費生充補者。廣東等省是也。雖辦法各有不同。然

各省游學生之學額。均從此一律認定。不復減少矣。如照前次辦法。出缺不補。百餘之游學生。不滿十年。則無一人矣。今出缺准補。而每年常有百二十餘人。則十年可多出數百名之游學人才。一出一入。何啻天壤。余在英四年。游學生人數始終未減少一名。自費生有此出路。亦各安心就學。自後我國在法比德各國之留學生。亦倣照英國辦法。定爲學額。卽留美學生亦照行之矣。近八九年來。游學人才輩出。此後更願繼續而行。垂爲定例。余固不敢自矜其功。然此一舉。得達廣育人才之目的。差強人意耳。茲就敘述日記之便。略將請定學額之事。筆之於冊。俾知始末情形耳。

函致各省都督籌匯留學經費

敬啓者。文選執役英國監督處。於今一年。所任皆各省之事。平時學款皆商承各提學使直接匯寄。自武漢事起。中原多故。於是音問隔絕。我游學英國同志百二十人之學費。亦兩月不至。曾數電學部暫假學款。以冀稍資挹注。然學部亦以庫款告匱。未有以應也。勢不獲已。乃婉轉告貸於倫敦華比銀行。矢言中國現時實因政治改革。教育經費。純係中立性質。無論變革如何。將來各省均當承認。陳說再三。始允借英金五千鎊。於是西本年十一十二兩月學費得以

照發。幷或可支持至西明年正月。然以無抵押之借款。借至五千鎊之多。銀行係營業性質。欠借之事。可暫不可常。款源不繼。決非持久之道。查海外公費生。大半皆寒賤子弟。一旦學費告罄。則相率輟學。仍須代籌川資歸國。否則流離失所。不堪設想。側聞各省經營新政。需才孔亟。將培植之不暇。何忍以多年在外好學有用之士。置而不一垂顧。文選對於留英公費生百二十人。負公僕之義務。且甘苦患難實共之。日夜焦思。惟冀

祖國鄉老。樹儲才之廣願。建豐國之遠猷。俯念負笈遠學之士。輟業可惜。流落可矜。立籌學款。迅與維持。俾得旅學有資。幸甚盼甚。所有
貴省應匯學款數目。錄呈於後。務乞

迅賜發棠。電匯到英。以解倒懸之急。幷祈

電覆。不勝迫切

待命之至。祇請

台安

駐英游學生監督錢文選謹上

西十二月十五日

記武漢起義留英學生經費困難情形

辛亥武漢起義。不旬日響應者十餘省。當時戎馬倥傯。軍書旁午。留英學生經費。向之由各省匯寄者。至此則中斷也。不獨各省無暇及此。卽學部亦乏款接濟。此項學生經費。月須三萬金左右。至期必付。否則勢將瓦解。良以學生旅居學舍或客店。照英俗兩星期不付房火等費。卽下逐客之令。余見此情形。各省函電旣已不通。其實亦兼顧不遑。不能不電稟學部請示。連上三電。未荷一答。余最後一電。聲明有難負責任之語。詞意急迫。學部覆電云。刻下庫空如洗。實無力接濟。惟有請轉飭諸生。節衣縮食。勉度目前。一俟大局定後。自當設法匯寄等因。接此電後。知學部實亦無法籌款。若再去電。徒費電費。然以此電示學生。則反令彼等大起恐慌。辦事更爲棘手。余遂將此電歸檔。不欲轉示。良以公佈節衣縮食之電。恐起學生之詰問。節衣必先有衣而後可節。縮食亦必先有食而後可縮。今僅以一紙空電。轉告諸生。深知於事無濟。且反生障礙。當時各游學生紛紛來電。詢問學費之事。如何辦法。余不能不示以鎮靜。遂擬傳單通告諸生。云刻下學費完全由本監督擔任。按期照發。本監督在英一日。自當維持一日。甘苦當與諸生共之。萬一山窮水盡。實無法可設。亦當先一月通知。另籌川資回國。諸生目下。應安心

就學。不可自擾。學生始稍稍安靜。然銀行能否借款。余尙無把握。焦灼之情。獨有自知。孰意未幾各銀行奉各本國命令。關於中國南北之事。概不贊助。以示中立。故對於兩方面均不得借款。蓋恐以之購買軍火。延長戰爭也。華比銀行亦即回言。不再借款。余得此消息。更形焦灼。以爲余一片維持之苦心不能達到也。當時比國游學生。亦因銀行停借。已全體給資飭令回國。法國游學生亦着手要求。德國以使館抵押。籌借學費。各處正在紛擾之時。英國各處學生。得此消息。大起恐慌。函電交問。日必數十起。或請給川資回國。以免流落異域。增父母之憂。或請先發一二月學費。均勻用之。免半途輟學。情詞懇切。大有窮途失路之悲。令人生無窮之感。人多言難。議論紛紜。總之回國與留英。均非有費不可。若不另籌善法。銀行既已停借。分文不能支取。坐以待斃。非計之得耳。余雖處於萬難之中。日夜焦思。寢食不安者兩閱月。然仍持鎮靜主義。電覆各學生安心就學。不必過慮。余亦知款項非他事可比。借措不易。駐英公使館薪水亦兩月不至。無法可設。使署偶過支一二百鎊。聞某銀行。卽不照付。以一國代表。尙且如此。余何人斯。更能籌借巨款。以應付百二十餘學生耶。然於無法之中。不能不求救急之方。余平日與英人感情尙好。遂以此事商之英國大儒瓦立司等諸公。余云敝國因政局未定。以致學費

停滯。但各學生係來貴國求學。今一律枵腹。想貴國諸公當不忍坐視不救也。瓦大儒等。卽以此事白之英外部大臣葛雷。決議由其秘書復函。允借數月學費。俟中國政局平定歸還等語。余得有此函。雖知學費之事已有着落。然余心尙未釋然。遂卽袖此函至華比銀行。與該行總理再商之。余云貴行停借學費。因見敵國政局未定。余固不能有他言也。然試思敵國學生有百餘人在此留學。可以一日無費乎。既不能坐以待斃。當必有他法以度此難關。刻承英政府允借數月之學費。由英國銀行照付。與其借款。亦須利息。而又須承情。何若由貴行借之。同一付息。俾免另承英國之情。監督處與貴行交易數年。款達百餘萬元。從未缺少分文。如貴行再堅持不能支借主義。以後彼此交易卽行斷絕。監督處不能不與英國銀行往來。此勢所必至。余遂出信示之。該總理見有此信。卽不堅持前議。云本行非不贊助。惟事關通令。不便有違。今惟有電達總行請示。能否再借。明日回信。次日卽來電話云。已得總行命令。允准可以再行支借。惟必有三項條件。(一)須電達北京政府。與駐北京比國公使商明。復電准辦。(二)須由駐英中國公使簽字。(三)借款以五萬鎊(五十萬元)爲限。專供學費之用。余答云三件均可照辦。余卽刻電達學部。兩日卽得覆電照准。因事機迫切。連夜赴使署稟明劉公使。深蒙劉公使

贊助。次日卽爲簽字函致華比銀行。余並與該銀行自行商定。云款雖承借五萬鎊。但余并非一時支取全數。所有每月學費。由余出支票。仍由各學生自行向貴行支取。實支實算。當無將學款購買軍火之事。可請放心。該銀行甚爲滿意。銀行借款之事既定。余卽函覆瓦大儒等聲明學款現經借妥。敬謝英政府厚意。一面通電各學生。云學費已借有的款。務各安心就學。勿以此事爲慮。再紛紛來電詢問。一面通電各省。以游學生學款一日不能緩。各該省旣因戎馬倥傯。不及匯款。勢不能不設法籌借。以應一時之急需。所有各該省學費。暫由文選籌墊。免各生廢學。一俟大局定後。卽請火速匯款接濟。免致竭蹶。又一面詳報學部。學款雖已措借五十萬元。然非一時提用。每月支用若干。則作借若干。利息亦按每月支借實數認付。庶免公家多有損失。在銀行固欲每月以五十萬計算利息。經余迭次交涉。云旣未一次支用。卽不能全數起息。所指定五十萬元者。不過限數耳。銀行遂無異言。但此次旣無抵押之品。能借此巨款。實出意料之外。雖幸英政府之贊助。得有此效果。然亦係我國向日邦交上之威信所致。今有此巨款。辦事免致竭蹶。旋因法國游學生學費不繼。余又撥款五萬元接濟。旋接准各省都督回電。請速維持。云軍事稍定。款卽匯解。余見各省均有覆電。心始釋然。余維持至十閱月之久。已

借用之學款。達三四十萬之多。直至民國二年秋冬之際。各省始有款匯來。由余歸還銀行。責任得以解免。當時之困難。罄竹難書。幸能保全游學生不致廢學者。雖由余苦心維持。而實亦公使之力。英國之助也。爰書始末。以誌不忘。

請通告各省赴英自費生應預將學費籌定

爲申呈事。竊查英國各專門高等暨大學收錄學生。均由競爭試驗入校。是以中國學生向不由使館保送。其自費生之來英者。亦不盡有咨文。是以監督處無從稽查。該生等到英後。大率借寓英國人家。延師豫備英文。及各普通學。間有進其中學校者。惟英國各專門高等暨大學。程度極高。錄取不易。如英文算學根柢太淺。每有豫備數年之久。仍未能進習專門。其年富境裕。力能持久者。卽多留學數年。亦無所顧慮。迺有寒畯之子。稱貸游學。貿貿而來。既不諳英國學校之情形。又不知日用所需之幾何。且普通學根柢極淺。往往到英後。困難萬狀。迨旅費告罄。中途輟學。曠時耗費。至爲可惜。甚至川資無著。乞助同學。狼狽不堪。監督處雖屢有所聞。然以頒行游學新章後。一切款項皆有定額。勢不能更行旁及。坐視心良不忍。遇事又愛莫能助。此誠無可如何者也。職是以就調查所得。略盡忠告。凡內地同志有赴英國游學者。須具以下

三項之資格。(一)有中學畢業程度。其英文已能直接聽講者。(二)豫定留學年限。每年學費至少英金二百鎊。約中國庫平銀一千五百兩。(三)豫定願學科目。各國科學各有所長。英國爲工業之國。習工業最宜。又英國法律與大陸各國異致。我國人通英法者甚少。亦可別樹一幟。再現在各省官費學額多主張以內地各學堂畢業生選派。而某某等省已聲明嗣後停止游學西洋官費。然則官費既無可希望。而自費留學不可不豫將學費籌定也。職既有所見。不敢不據實直陳。擬請

憲台轉咨

學部。通行各省提學使。遍告學界。俾作游學之助。毋任企禱。理合備文呈懇
憲台核奪施行。須至申呈者

右 申 呈

出使英國大臣劉

條陳英國游學事宜改良辦法

敬稟者。竊英國學務事宜。文選到差。後隨時留心考查。當此民國新立。教育改良。早思稍呈管

見。惟見大局將定。財政問題尙未解決。故遲遲未發。頃聞

大部從新組織。教育日求進行。對於游學事宜。正籌辦法。除已將英國各學校制度分爲四冊呈報外。茲將英國游學事宜。應行改良及將來辦法。約分數事。敬爲

鈞部陳之

一英國監督處宜裁撤也。前清舊制。名實未符。雖曰游學生監督。實操會計之任。并須負籌款維持之責。去歲有事以後。困難現象已見。勿庸多贅。以英國游學生有百餘人。逐月核發學費。結算帳目。加之內對於各部。外對於各省。近對於各生文牘之往還。信電之答覆。實屬繁劇。在外人視爲最簡單之事。而我國行之。卽有種種之繁難。其故安在。蓋有未去其繁就其簡耳。今若將監督處裁撤。以後各生學費。應由各省每半年匯交

鈞部。由部彙匯使署。轉託銀行或各大學校長發給。各校長視學生如子弟。亦樂爲之。且學款匯交各大學。每年西十月校費。卽由各大學按月預扣。不必臨時另籌鉅款代繳。尤覺便當。於是各省見既無監督處。可以貸款周轉。學費自必先行按期匯解。再無欠款之事。其他項要事。仍託使署辦理。蓋在外國之事。非使署辦理不可。卽現有監督處。諸事亦多請求使署也。裁撤

之後。一切文卷等事。均交使署接收。使署對於游學情形。本來清晰。似亦不必另有他項設置。以省煩文。而節經費。當此民國成立。財政困難。開源必先節流。今若將英國監督處裁撤。每年可省數千金之公款。且英國官費生人數倍於他國。學務較繁。加之英京百物昂貴。甲於全球。自罷工事竣。物價倍增。監督處留存一日。公費卽一日不敷。今若早日裁去。既省鈞部經費。亦免監督處賠墊。兩方面稱便。此英國監督處宜裁撤也。

一學費欠款宜先由部籌出也。刻下學費均係借貸銀行。由部允准擔保在案。既裁撤監督處。還款之法。不能不先籌及。并須預籌各生學費。否則監督處一裁。銀行必追索前欠。借款又因之停付。各生卽無費留學。此不可不慮及也。應由

鈞部先商明

財政部撥出游學經費若干萬。將前欠一概還清。并稍籌的款。以預備各生以後學費。至少須預備至本年底止。欠款及學費英國約計二萬鎊（二十萬元）一面早日通告各省。自明年爲始。令各省先期匯款。交由

鈞部轉匯。以期統一。此次由中央政府借撥之款。以後由各省匯還。既省文牘。亦少責任。銀行

欠款還清。監督處即可裁撤。此學費欠款宜先由部籌出也。

一遣派學生出洋須加慎選也。曩者各省遣派學生。不論程度。往往有到外國後。不能入大學。直接受課。嗣後游學生須有直接入大學之程度。由部考驗合格。始可遣派。但自費生不在此例。至以前派出者。應俟其畢業。再行回國。以免半途廢學。功虧一簣。英國各大學。皆係私立。收費甚鉅。與歐洲大陸情形不同。學醫及工礦者。每年校費約在四五十鎊之間。學費似不宜議減。目下須統籌全局。博採羣議。安定新章。必先斟酌盡善而後發。最要者能慎選學生出洋。即可省章程無限之繁文。此遣派學生出洋須加慎選也。

一民國大學與專門學校宜多設也。民國初立。需才孔亟。但財政困乏。各省皆同。每年游學經費。爲數甚鉅。內體時艱。外察實事。誠不如在內地廣設大學與專門學校。如北京南京漢口上海等處。均可設立。多聘西洋有名譽之教員。大學與專門學校執事人員。均選出洋畢業有經驗者充任。管理得法。學生收效不亞於出洋。且中西文并重。尤無偏重之弊。亦可以少數之財力。造就多數之人才。頃聞英國已有人正在籌款。欲在漢口設立大學。以攬我教育權。是我立大學更不容緩也。查歐西各國。大半在本國大學或高等學校畢業後。國家始派赴他國。名爲

留學。實兼考查。故收效甚宏。出洋所以較內地有益者。以語言爲最要。今若規定凡在大學或高等學校畢業後有志出洋者。准由政府給予游學費。少則二年。多則四年。爲實地驗習之用。精於何文者。派赴何國。長於何學者。專習何科。文字旣優。語言易習。且在本國學問已有根柢。識見必高。可以藉游學考查外國一切之政治風俗。隨時報告政府。於個人國家均有裨益。此民國大學及專門學校宜多設也。

以上四端。略呈管見。本愚者千慮一得之思。謹作芻蕘之獻。以備

採擇施行。敬請

鈞安

駐英游學生監督錢文選謹稟 民國元年七月十八日

報告英國學務情形

敬稟者竊維儲備人才。端在教育。東西各國表面上觀之。或以兵力強。或以實業富。根本上言之。其富其強。無不由於教育。以英國海軍之強。製造之精。而政府尤日夕經營小學教育。或由地方議會籌費。或由政府補助。歲支千百萬鉅款而不惜。是以無人不學。學能致用。其助憲政

之進行者。至深且遠。文選在英每假公餘。親赴各處學校。參觀調查。或臨各種大會。聽其演說。并入倫敦大學聽講功課。察其根本之論。仍以教育爲首務。然英國教育自一千八百七十年定有律令以來。距今不過四十年。逐年多有改定之律令。按其改良之規章。卽知其發達之次序。茲將此項逐年律令呈送。以備

採擇。查歐洲近年學術尙新。機械尙巧。推其本源。多由電力與蒸汽發動各種機器。凡人力所不能爲者。機器能爲之。大而輪機鐵軌。小而釘頭木屑。無不用機器。惟供材料取物品。人力仍不可少。未見者以爲奇觀。習知者視爲常事。卽以飛艇言之。誠爲今日發明最新之法也。文選七月初旬送陸軍部官費生厲汝燕入布理司奪廠學習飛艇。廠主導觀各種飛機。試以駕駛等法。見飛艇上有機器。前推則可落下。後拉則可升起。左右互推。則旋轉自如。至小者可坐一人。或二人。至大者可坐二十人。升高可達二英里有半。約華里八里餘。再高則寒不可禦矣。小者行遠日可達三四百英里。該廠主云。一二年內。將製造大者。由英升起。超過大西洋海面。至美國。二日可達。若乘輪船。則須七日。并云飛艇大者愈易造。而愈平穩。飛艇行空中。亦猶輪舟行海面也。入廠學習駕駛。如有根柢者。兩月卽可畢業。其事并不甚難。其理亦甚明晰。除機輪

暫須由外國購置外。其餘篷板繩索。如購一飛機爲模樣。我國即可自製。茲將該廠習飛機各種章程及圖畫。一併呈請

鈞覽。再本年西八月英國工黨同盟罷工。火車停行。各處郵政不通。我國游學各生。散居各處。一時頗爲驚恐。文選當馳電存問。并提前預寄學費。以安其心。茲幸工黨事靜。於各校上課毫無影響。用特稟陳。以紓

廬念。以後有關學務事宜。再隨時稟呈。肅此恭叩
鈞安

駐英游學生監督錢文選謹稟 清宣統三年九月

英國學務報告一

英國號稱三島。實分四區。曰英吉利曰蘇格蘭曰愛爾蘭曰威爾思。英吉利崇尚文學。以牛津
圖橋諸大學爲最。蘇格蘭崇尚實業。以愛丁堡葛拉司哥諸大學爲最。愛爾蘭崇尚宗教。以多
布林景教諸大學爲最。威爾思崇尚工藝。以威爾思大學爲最。四處政令風俗。向來不同。故學
校制度。亦稍有歧異。就其大綱而論。其教育制度不外以下二端。

(一) 放任主義。

(二) 干涉主義。

國家教育之發達。端在師資與財力。有師資而無財力難。有財力而無師資亦難。二者兼備矣。而欲舉全國人民之教育。由政府獨操之則尤難。與其兼顧不遑。何如分別管理。以收異旨同歸之效。此放任干涉二主義所由來也。英國中學以上之教育制度爲放任主義。中學以下之教育制度爲干涉主義。放任主義者。一切學校規則悉聽各學校自治。而學部與地方議會無干涉糾察之權。間有受國家及地方津貼之學堂。然只由學部及地方議會遣員與該校職員協議而已。故中學以上各校經費之籌措。教員之去留。科目之多寡。學生之名額。率聽自爲風氣。卽以倫敦大學之制度。與牛津圖橋二大學之制度相提並論。亦不相同。倫敦大學重在考試。不重在管理。而牛津圖橋二大學。重在管理。於考試獨寬。倫敦大學僅爲其所屬之各專門學校考試之地。類似考院。并不授課。每遇考試。先期由各專門學校聲明所授之課程。由該大學執事就其所學而出題考核之。蓋各員授課一地。考試又一地。各該專門學校校長教員皆無所用其力。所以杜弊也。果其程度相合。曾應過甄別考試者。二三年中卽可得畢業文憑。至

學生平日勤奮與否。多不稽查。其勤苦用功者。固可按期畢業。否則雖五七年亦或不能。牛津圖橋二大學則不然。該兩校雖合各專門學校組織而成。然可分爲二事。

(一)各分校之考試總校司之。

(二)各分校之特別專科總校教授之。

總校司考試。所以收統一之效。而各分校中學生有習特別專科在常科之外者。則集其學科相同或相類者於總校中教授之。如是教習可減。費用可省。與倫敦大學專爲考試之地。而非授課之所。稍有不同也。其管理之法。尤與倫敦大學相異。各學生入校時。均有一定之寄宿舍。而寄宿舍分爲校內校外。校外寄宿舍。由該總校管理員擇定出入。仍由其稽查。惟無論校內校外。晚膳必至學堂會食。不到者作爲曠課。每晚十點鐘以前。必須到寄宿舍。違者輕則受罰。重則開除。請假多者。於寒暑假時扣假。其例與告假鐘點同。學生上講堂見校長與教員。皆須一律着學衣。甚至一舉一動。無不受校長干涉。故該二大學之學生。皆循守規矩。因其專一管理。故考試較倫敦大學稍寬。學生必須住滿三年。始能得畢業文憑。故往往於各科中留一科至期滿時方准投考。既論程度。又論資格。此其不同之點也。總之各大學規則之歧異。皆由於

管理之權操之各校。中央政府不加干涉所致。至英國政府對於中學以上之學校而主放任主義者。其原因約有三端。

一風俗之使然。

一經費之自籌。

一學科之取舍。

英國大學與高等實無區別。合全體言之。則均係大學。分晰言之。則大學內之專門。類似我國分科大學。各該大學成立甚早。向係自治。英國本爲習慣法。故政府久已承認其自治。不再加以干涉。其所以放任者一也。各大學之經費。不出自前皇之遺愛。卽出自巨紳之捐助。或慈善家之報効。權利義務。本係相衡。政府既無任經費之義務。卽無干涉之權利。其所以放任者二也。各大學之學科多寡不一。學生入堂時。聽人自擇。習科目多者則納費多。習科目少者則納費少。悉視學生性情之所相近。與力量之所能及。如政府頒一定制。令性不近力不及者亦強而習之。則學無進益。必相率退步。況大學之學生。程度已高。可以自擇學科。不必繩之以規則。縛之以法令。其所以放任者三也。至英國中學校。大都係民立者。國家只有稽察之權。未使用

其干涉。此皆放任之原因也。雖然中學以上既主放任。而考其內容及現在情形。又似於放任之中。仍含有管理之意。緣英國各大學校長。多公舉政府中大員充之。稱爲大學總長。凡大學校中一切設施。無大學總長認可簽字。則不能施行。若自表面觀之。則政府似毫無管理干涉等事矣。至英國小學經費。係受國家及地方之供給。故國家管理極嚴。純然爲干涉主義。小學爲大學之根本。人材之基礎。故欲教育發達。必先注意於小學教育。欲教育普及。尤在行強迫教育之法令。此國家所夕經營於小學校制度而不遺餘力也。一千九百年設學部。頒行教育律。設地方議會。凡小學校去留教員。改良章程。以及監察之事。統由地方議會管理。卽由地方議會抽各項稅則以充小學經常之費。一千九百十一年五月。倫敦地方議會提議。以定一千九百十二年小學教育經費。其統計預算之總額。六百零二萬四千九百三十三鎊。約合我國六十兆零二十四萬九千三百三十元。內五百零一萬一千零三十二鎊。約合五十兆零十一萬零三百二十元。爲初等教育經費。內一百零一萬三千九百零一鎊。約合十兆零十三萬九千零十元。爲高等小學經費。較之上年小學教育經費。則又加增矣。英國對於小學教育。不惜鉅款。以培植之。蓋欲實行強迫教育。必先由政府籌費。而後能迫令有子女者就學。設政府不

設法籌款。仍收學費。則貧民之子女無力就學。雖有強迫之制度。恐終不能行。故三島之民。無人不學。卽爲工人傭婦。其幼時亦必在學堂數年。人人有普通知識。一切法律。固知遵守。卽愛國心亦因之而生。此小學教育所收之效果也。小學以上女子教育。亦與男子教育並重。惟女子畢業。只給修業文憑。而不給學位。蓋女子刻下尙未得有選舉權也。女子入大學者。亦頗不乏人。卽以圓橋大學一處而論。學生四千人中。女子已有四百人。占十分之一。女子教育之興。亦於國民生計上大有關係。遍觀三島之地。上而公家之電報郵政。下而私人之店鋪行商。無不用女子執事。故全國人民無一坐食。此又女學振興之效果也。

駐英游學生監督錢文選調查

宣統三年三月 日

英國學務報告二

英國官費生。較歐洲各國爲多。共有一百二十餘人。平日則勤其所學。假期則互相聚會。或研究科學。或討論新理。於是有留英學會之組織。總會立於倫敦支會設於蘇島。本年夏假。由總會發起。將設立歐洲游學生總學會。聞各國學生均贊成。曾於本年西七月初旬在倫敦開大

會一次。到會者頗衆。刻正組織總會辦法。此外無他種會社之組織。亦無入所駐國他種社會之情事。惟入所駐國各種學會者實繁有徒。英國各種學會甚多。我國游學生或因研究法、政、文、商而入之。或因研究農、工、格致、醫、而入之。西七月中旬倫敦大學之經濟專門學校。開萬國商業研究會。我國學生入會者甚多。西七月下旬倫敦大學開萬國人種會。我國學生入會者尤衆。該會研究各種學術。希冀人類平等。聚各色人種於一堂。誠爲千古之創舉。數十國遣派代表。咸稱一時之盛事。此種特別大會。自應詳細調查。事關現時學務。更宜摘要報告。是會於本年閏六月初一日開會。初四日畢會。謹將開會各情形。分爲三期。報告於左。

第一期 會前之預備

(一)宗旨。提倡東西民族道德心。以敦友誼進大同爲宗旨。

(二)問題。是會範圍廣大。問題繁博。長篇巨冊。美不勝收。只能摘要討論之。

惟此會性質純然爲學理上之研究。不涉及政治事件。

研究不涉及政治事件

(三)會長。英國貴族院威爾德樂殿下。

(四)代表。特派代表員有三十三國。

中國。美國。德國。

法國。俄國。日本。

匈牙利。意大利。西班牙。

土耳其。比利時。波斯。

埃及。希臘。秘魯。

亞根庭。巴西。布羅加利。

中非。直里。哥司他利加。

多池蘭。日斯巴利亞。芬蘭。

印度。亞羅薩。墨西哥。

荷蘭。俄司托里池。羅馬利亞。

賽比利亞。南非。西印度。

(五)會員。

(甲)各國政府特派代表員。有三十三國。兼爲會員。

(乙)贊成者有五十餘國。

(丙)各國議院議長三十餘人。

(丁)仲裁裁判所會員及第二次海牙和平會會員大半與會。

(戊)英國前任及現任宰相八人。總督十二人。

(己)主教四十餘人。

(庚)公法大家百三十餘人

(辛)人種學社會學之首領。自治會會員等。以及他著名之人多入會。

(六)語言。該會通用語言。以英、法、德、意、四國文字爲主。至於印刷出版之件。全用英法兩文。

(七)會金。入會爲會員。分爲兩種。

(甲)發起人。每人納入會金一鎊一先。

(乙)贊成員。每人納入會金七先六便。

(八)會議。各國代表均於六月中旬齊集倫敦。六月二十五二十八等日開代表員會議。所

議之事如下。

(甲)代表位次居上。與會長並列。會員位次在下。與書記員等並列。

(乙)代表到會。須佩本會徽章。

(丙)代表自六月二十五日起。至閏六月初四日止。每日互相公宴。或茶會。無論何國代表約請。均由本會代爲發帖公佈。宴會與茶會。或演說。或互相談論詢問一切。以聯絡感情。克敦友誼。各代表並將在本國及在外國住址開單互送。以備將來通信之用。

(丁)前次各國皆有演說稿寄來。業已付印成書。刻下各演說稿。概不及付印。但俟會事將終。再行補印。

第二期 開會之情形

閏六月初一日開正式會至初四日止。逐日分爲兩次。

第一次。上午十點鐘至下午一點鐘。

第二次。下午二點半鐘至五點鐘。

初一日

第一次 討論之問題。

(一) 種族民族與國家之意義。

(二) 人種學之觀念。

(三) 社會學爲人種之要點。

(四) 種族平等之問題。

第二次 討論之問題。

(一) 自治之理論。

(二) 地理經濟及政治之狀況。

(三) 語言統一與分歧之關係。

(四) 宗教統一與分歧之關係。

(五) 風俗道德不同之關係。

(六) 形骸永久之不同。

(七) 各種族智力之高下。由於教化之影響。

(八)現時婦女之地位。

(九)人類之現狀無常態。

(十)各種族顏色之不同。由於氣候之使然。

(十一)種族混淆之結果。

初二日

第一次 討論之問題。

關係立憲制度之趨向。各國曾有送演說稿者。據此討論之。各國所送演說稿之名人開列於下。

(一)中國 伍廷芳。

(二)日本 達克必。
(譯音以下仿此)

(三)土耳其 托非渴。

(四)波斯 亞海亞。

(五)東西印度 高海樂。

(六)埃及 騷樂俾。

(七)海提 利克太姆。

(八)匈加利 廷蒙。

(九)俄羅斯 亞司清哥。

第二次 討論之問題。

(一)投資與外債。

(二)工資與移民。

(三)互市。

(四)科學與工藝。文字與印刷。

(五)私家創造之事業。能影響於世界。

(六)於義大利設萬國農學會。

初三日

第一次 討論之問題。

(一) 種族間倫理上根本之原則。與經驗上之適用。

(二) 猶太種族。

(三) 近世道德心。待遇屬國人民之觀念。

(四) 殖民地與屬國之政府。

(五) 教會之感化。

(六) 契約規定之工人與強迫工人之區別。

(七) 毒物與雅片之貿易。

第二次 討論之問題。

(一) 黑人在世界上之地位。

(二) 南非土人種族之問題。

(三) 西非之問題。

(四) 黑人在美洲之情形。

(五) 黑人種族與白人婦女之關係。

(六) 北美印度人。

(七) 巴西黑白相合之種族。

初四日

第一次 討論之問題。

(一) 白種應有敬愛他種之心。

(二) 國際法條約會議與海牙之裁判。

(三) 國際法對於屬國種族之關係。

(四) 有期之平和會議。

第二次 討論之問題。

(一) 出報爲和平之機關。

(二) 國際語言。

(三) 學堂之德育與人種之關係。

(四) 設立世界俱樂部。

(五)提倡種族間國際上之好意。

按是日會畢。所有在會人員合影。以誌紀念。

第三期 會終之報告

(一)關於人種會之事。

初四日會終。會長聚各國代表於議事廳。籌議下次開會辦法。商定每四年開會一次。總會設於倫敦各國可設立分會。擬上書與第三次海牙和平和會。請各國代表報告本國。可否於各學堂內添設人種學一科。以資提倡。而期聯絡。

(二)關於中國之事。

自開會以來。除逐日排定討論問題外。並請各國代表及在會會員演說。惟每人演說以五分鐘爲限。故演說辭不能過長。其演說有關於中國者則詳記之。以見外人對我之觀念也。

(甲)李佳白君之演說。

余久歷中土。深知中國情形。近年來銳意維新。大有進步。茲以時間太促。不能詳論。聊舉大端如下。

(1)改革之和平。自古由專制改革立憲與共和。無不流血。以英國爲世界立憲之母國。尙有七月暴動之事。而中國改革立憲。甚爲和平。誠爲世界各國所不及。

(2)道德之關係。今日世界各國純以法治國。中國純以道德治國。人民平日受道德之陶育。與人交際。言忠信。行篤敬。上而士大夫。下而匹夫匹婦。莫不如此。非他用權術行霸道之國民。所可望其項背也。

(3)教育之發達。中國自科舉廢。學堂興。教育日見發達。各處學堂林立。聞某省一縣中有二百餘小學堂。近年又派遣聰穎子弟。分赴東西各國留學。聞不下二萬人。或學工商。或學實業。人才日出。國勢必振。各國不可以前數年之中國比也。

(乙)威司里君之演說。

中國近有一事。令人可敬可佩者。莫如煙禁。自禁令頒行以來。內地早已無人再敢私種。吸煙者有罪。私售者受罰。大有禁絕之望。惟印度等處仍以鴉片輸入中國。則不能一時禁絕。本會以世界和平天下一家爲目的。不忍見他國以毒物售於中國。况中國本爲世界大國。一旦振興。可以執東方之牛耳。將來維持東方和平。正惟中國是賴。中

國能自禁之。已屬美事。吾人應如何設法轉告英政府。將此項貿易停止。請在會諸君竭力維持之。鄙人足未履中土。交未及華人。不過主持公道。以冀和平耳。

(丙) 多拉克女士之演說。

余游歷中國有年。中國情形聊知大概。人多云欲強中國。在練兵。欲富中國。在興實業。語固近理。然不知欲強中國者。尤在化除男女界限也。中國人民號稱四萬萬。女子居其半。女子生活多仰給男子。間有一二自食其力者甚少。以二萬萬男子養二萬萬女子。此二萬萬男子即無餘力自立事業。自求學問。女子所以不能自立之故。固在女子不能求學。尤在男子界限太嚴也。中國古訓。女子七歲不出中庭。而年長更無論矣。泰西則不然。女子無一人不任事。幼則入學讀書。長則從事生計。上而公家之郵電各局。所下而商行店舖以及私家之書記。多用女子。蓋女子工薪廉而任事專也。人人有事業。則無坐食之人。男子無內顧之憂。即可以全力擔任國家之大事。或研究箇人之學術。一人有一人之恆業。國安得不強。或謂中國爲禮法之國。一旦男女界限太寬。不無流弊。此實不然。不知男女相見愈少者。則流弊愈多。若平日習以爲常。久之流弊自免。

此理甚淺。勿庸詳述。中國不欲自強則已。苟欲自強。當自化除男女界限始。欲化除男女界限。當自興女子學始。

(丁) 中國學部特派代表錢文選之演說。

(一) 中國孔聖道德與人種會之關係。(譯英文演說稿)

中華之文明。實基於孔子之道德。孔子生於紀元前五百年頃。其生平之大義微言。均載於四書五經之內。泰西人士有讀其書者。均謂孔子道德。實超乎一切之上。我國學堂教授倫理。均以孔子道德爲主。當科舉未廢以前。咸以四書五經試士子。今日學堂亦有之。試觀孔子高尚之道德。後世人民無不受其賜。其教澤不僅及於中土人民。實播於五洲。思及遐邇。回憶孔子之世。當羅馬始立之時。上下交爭。歐洲仍屬蠻夷之境。當斯時也。我孔子卽能創立高尚之道德。誠爲萬世之師表。孔子向以一視同仁爲懷。不論是否同色同種。論語有言。四海之內皆兄弟。後蘇格蘭著名詩家北恩司亦表彰此義。孔子之格言。不亦今日天下一家主義之先導乎。孔子教人五德。曰仁、義、禮、智、信。孔子又曰。言忠信。行篤敬。雖蠻貊之邦行矣。孔子更教人以恕。曰己所不欲。勿施於人。而耶教訓人曰。己所欲。施於人。語相反。而意實

同也。設宇宙蒼生俱行恕道。待人如己。世界可臻大同矣。孔子固云四海之內皆兄弟。並云天下爲一家。使環球各國能本斯義。互相友愛。當無爭端之舉。卽偶有之。亦只可以和平解決。不可稱干比戈。鄙人深盼英美仲裁裁判條約不日成立。並盼各國效法英美。凡有爭端。聽憑公斷。以冀而今而後。天下確爲一家。鄙人因時間有限。不克多述孔子之嘉言善行。然以上所述之大端。足以證明孔子德配天地。道冠古今。孔子距今有二千四百餘年。其教澤之精神或亦影響於今日萬國人種聯合會也。

(二)教育與人種會之關係。(譯英文演說稿)

今日萬國人種聯合會開會。世界各國皆派員到會。誠爲盛舉。將來遠大之結果。正未可限量。鄙人深盼在會諸君以睿智毅力。永久維持之。勿以一會而終止。此會以提倡東西民族無猜疑之思想。發友愛之感情。以期互相聯合爲宗旨。是以聚各國代表於一堂。討論各項問題。或言社會之情形。或論經濟之狀況。務以釋猜疑敦友誼爲指歸。但鄙人之意。欲求釋猜疑敦友誼。非提倡教育不爲功。夫猜疑多由於不明事理。惡感每生於互相誤會。故欲免爭端。而猜疑宜去。欲敦友愛。必先通彼此之情。鄙人深盼各國振興教育。有教育卽能明真

理。知世界大事。不蘊賤外之思想。推其仁愛。及於友邦。施於宇內。使人人受教育。則人羣進化。世界大同矣。茲引敵國近事以證之。曩者中華人民多輕視外人。或稱爲蠻夷。自近年教育發達以來。新智識日增。不獨無此思想。且知何國厚我者。而知圖報焉。我政府又派遣學生赴東西各國游學。不獨學其築路開礦練兵教育等事。並圖進於近世文明之強國。目下我國內地各項學堂林立。全國教育漸次普及。人民智識之增加。實受教育之效果。鄙人切望此會會員推行此義。勸各國振興教育。以去惡感。而化猜疑。俾世界早進大同。斯會幸甚。全球幸甚。

附識

自發起萬國人種聯合會以來。全球人士函電贊成者甚衆。各國又派代表與會。或以理想進言。或以實事提議。務期人類平等。無黃白紅黑之分。世界和平。進於大同之世。方今五洲洞闢。輪舶交通。凡我憲政之進行。和平之改革。教育之發達。雅片之嚴禁。外人洞若觀火。此次各演說家均贊揚稱美於中國者。良有以也。惟此次宗旨雖善。而實行不易。說者謂各國政俗之不同。人種之歧異。欲冀天下一家。人類平等。當亦在數十年後。今非其時矣。

駐英游學生監督 錢文選謹識
萬國人種聯合會中國學部特派代表

宣統三年七月 日

留英官費學生人數

留英學生人數。官費共有一百三十餘名。自費生約有三百五十餘名。惟自費生多係富商子弟。或由南洋。或由內地。往英留學。既係自費。不領官款。向不赴游學生監督處報名註冊。僅於畢業後。前來請領證明書而已。余到任後。切實調查。始知有此數。并分別通函。聲氣稍通。但自費生中。在外洋生長者居多。間有不知漢文。即稍知漢文者。因隨外國習慣。來函均用英文。故不知其確實姓名。蓋譯音互有不同也。茲僅將各部各省官費生姓名。列表於下。

省部		派姓	名	人	數	備	考
教育部	范紹廉	侯維良	靳志	林行規	卓寶謀		
	阮志道	楊會誥	薛序鏞	吳慶嵩	韓述祖	共	十名
交通部	何寶章	莊裕孫	張鏞	潘善聞	吳思遠		
	高恆儒	胡士熙	沈成斌	劉會撰	王繩善		

	林莊	顧詒燕	盛守鑫	余建復	李保齡	
	康時清	陸世勛	周熙	梁樹釗		共十九名
農商部	羅鴻年					一名
陸軍部	厲汝燕					一名
奉天	沈承烈	嚴江	陳廷紀	王世澄	朱劍	共五名
直隸	徐世襄	謝應瑞	葉景莘	沈瓚	孫瑞林	
	陶履恭					共六名
山東	侯延賓	李方城	李方琮	毛陞三		共四名
山西	耿步蟾	李建德	馬駿	趙廷雅	張勛仁	
	王憲	王錄勳	武蓋傑	楊長煜	張增	
	鄭永錫	鄭寶善	申湘	李蒙淑	趙奇英	
	楊維翰	白象錦	梁濟	蘭錫魁	龐全晉	
	王嘉瑞	梁上棟				共二十二名
江寧	王懷芬	葉秀憲	金懋章	郭世禧	金綬	

環球日記

一百二十二

四川	湖南	湖南		浙江	福建			安徽	江蘇	江蘇				
錢爲善 趙錫圻 全季梁	北曹工丞 向國華 石瑛	南章士釗 楊昌濟 楊守仁	丁紫芳 胡仁源	江胡祖同 包光鏞 錢寶琮 徐新六 葉啓標	建王學澧 雷文銓 沈成式	洪達 李寅恭	姚葵 劉藻彬 劉貽燕 程振鈞 龔安慶	徽丁緒賢 張貽侗 王星拱 鮑璞 邵家駿	蘇曹惠羣 趙承嘏 徐兆熊 王季緒	製江造局南 靳多福 任家金 鄭滋釋 沈同社 王旭榮	于基泰 陳世璋	鄧邦述 牛惠霖 刁承祖 李祖鴻 徐迪祥	嚴恩植 朱錫齡 丁文江 王懷曾 王鑒	
共三名	共三名	共三名	共七名		共三名	共十二名			共四名	共五名	共十七名			

廣	東	胡惠德	陳承漢	魏	肫	王寵慶	王寵益	
		李樹芬	林著勳	虞錫晉	陳斯銳	倫允襄		
		刁德仁						
廣	西	高	端	黃士謙				
		共	二	名				
		共	十	一	名			



環球日記

重游美國日記

一千九百十三年二月十六號余由上海放洋。午後五鐘由新關對面上亞力山大駁船。至吳淞上春洋丸 Shinyo Maru 船。趙廉臣鄺富灼唐露園諸君前來送行。余與秦君亮工毛君君同。乘頭等船位至吳淞。時已鐘鳴七下卽上海船。小件行李檢歸臥房。大件行李盛入箱艙。用時再由箱艙自行檢出。如均置臥房。物件太多。殊不便也。箱艙每日上午十一至十二點。下午四至五點。各開一次。（禮拜日不開）取物亦便。少焉艙中鳴鑼。催送客者下船。卽擬一電稿交來僕。轉送商務印書館代發。報告外交部赴美日期。并請電致駐美使館。轉舊金山領館。知照海關。便於登岸。

滬上應備放洋事宜。由滬上放洋。必先有護照。方能購船票。余有外部之護照。既係外交人員。卽照七五折之優待例付價。由上海至舊金山頭等艙位係四十五鎊。折成三十四鎊。惟鎊價略昂。每人合洋三百六十二元七角八分。雖有護照。亦須有醫生驗單。方可買船票。欲取醫生驗單。須由通濟隆 Cooks & Son 介紹。赴美國醫學博士司理德君 Dr. Street（住黃浦路

二十五號）查驗。蓋此君係美領館指定之醫生也。聞常人須於先一日去衣細驗。並給以二瓶。帶回盛大小便。次日送去。由該醫生用火煉之。無病始給憑單。醫生費英洋十元。向例也。其周折如此。司理德君見余係外交人員。不獨不驗。並另給一函。言明無驗病之必要。係按照一千九百〇四年之規定。優待外交人員也。醫生云。此函似無必要。如取之亦可以備不虞。出門總求妥貼。有此一函。萬一有留難之事發生。可以為證。未始非有用之物。

至登船應用之物。如籐椅。洗澡外衣。決不可少。有椅在船可坐。免再租用。（船上有椅出租）既多出費。且不能帶之行。洗澡外衣中國人向皆不用。在外人為必不可少之物。如每早赴浴池。若着小衣過人室。似不雅觀。若着大衣。穿脫又費事。是以外着洗澡衣為便。此衣如長袍形。無鈕扣。僅腰中一帶束之。上海洋服店均有。價不過七八元。此外罐頭小菜。如魚肉鬆等類。不妨稍帶。萬一遇風。不能進食。可以令艙僕煮粥食之。既有小菜。即可自便。至內衣及領頭宜多帶。以備常換。船上尚潔淨。如搭頭等艙位。晚禮服須備。（常禮服或燕尾服均可）常禮服逐日用之。燕尾服值跳舞用之。最得當也。船上常有跳舞之事。然不跳者亦聽之。此外如氈子。洋便鞋。洋小帽。均宜備之。尤有一事須注意者。我國人每因省錢。有搭二三等船位者。殊不知二三等

船位在下。與工人及苦力爲伍。不獨飲食惡劣。照應不周。而一種不可思議之穢氣。時入鼻中。聞之欲吐。卽不遇風浪。在船日多。人亦致病。如無力出洋。儘可不必遠行。除係苦工或因有特別事件不得已。而必搭二三等船位者外。凡係上等人均宜一律乘頭等船。不獨到一口岸不受醫生嚴查之苦。而並受種種利益之事。西儒有言曰。世界上惟有錢可以一切自由。誠非虛語也。如係頭等船位之客。每到一口岸。船員卽請各臨大餐間稍坐。醫生到時。僅一計人數而已。至二三等之客。往往受無窮之查驗。呼之而入。逐之而出。羣列候命。人人畏懼。必至醫生云無病。則心始安。不如頭等可以決其不驗。而皆屬無病也。我國赴舊金山賽會。不日將有出發者。苟得政府及團體之派遣。則登岸雖少留難。然以上所述之事。尙望注意焉。余兩渡太平洋。重游新大陸。凡以上所經見之事。不能不爲未出洋者一告耳。

十七號

是日天雨無風。海波不興。因一二號艙位不佳。與船上帳房 *Pruser* 交涉另換。渠云彼無權。必至橫濱後方可設法。蓋恐他人已定。卽搬入尙須移出等語。該一二號熱氣太盛。殊不能耐。凡買票者。須與船行討論艙位。此爲第一要義。萬不可忽。勿謂買票卽了事。在船多日。艙

位不宜。人每受病。能得二層 B. Dock 最好。否亦必在適中之處。以免有風浪時。受搖動之苦。此亦爲要事也。

十八號

是日天猶雨。早八點到長崎。未進口時。醫生登船查驗。忽於三等艙中。驗得一小呂宋女孩。據云十二歲。有天花發現。船中遂懸黃旗。船即不能進口。是日頭等艙客仍請至飯廳一坐。醫生亦僅查點數目而已。並無何項之查驗。故吾華人出口。總以搭頭等艙位爲宜。勿惜此船費。至受查驗之苦。船停一日。晚始進口。余即赴領館。長崎之船。不能逕赴馬頭。須用小舟載之登岸。NIPPON 公司。本有駁船。然須一點鐘始有一次。若因有事。不能候。可以另僱。往返各三角。（日本三十錢）十九號早七點。舟開駛赴神戶。

二十號

是日早七點。舟抵神戶。忽又有人云。三等艙中有病人。醫生云病尙不緊要。於是船始入口。本可於早晨登岸。而遲至午後者。亦因有病人之故也。駐日本使館館員周君。於是日離船乘車赴東京。神戶較長崎爲大。余同秦毛二君赴市買郵票。並乘東洋車繞市一週。約四十分鐘。並

赴一廟見抽籤等事。與中國同。惟廟卑下耳。日本信佛教之風。較我國爲甚。二十一號下午六點船開駛赴橫濱。

二十二號（禮拜日）

是日下午六鐘舟抵橫濱。飯後赴街代秦毛二君詢通濟隆往薩摩阿Samoa之船期及價目。將出門雪雨交加。無車可僱。余與秦毛二君步行赴通濟隆。而沿途泥滑不堪言狀。旋余見一車僱之先往。余上車時曾問明車夫今日禮拜。船行是否開門。答云開門。至則並未開門。不得已折回。與秦毛二君另僱三車。各出二十錢。一事未辦。徒勞往返。冒風雪而受冷也。

二十三號（禮拜一）

是日早起天仍雨。早間毛君已赴領事館詢船期。該領館只有王總領事一人。餘皆調赴他處。派人送毛君至通濟隆。以不識英文。則以中文詢之。回稱三月十三號有船。自檀香山開赴薩摩阿。價三十二鎊云云。午飯後予再赴通濟隆代詢之。因上年五月余曾游其地。與該公司相熟。到時招待周至。遂代詳查一切。方知三月十六號始有薩露馬Sanoma船開赴薩摩島Samoa, Apia。船價頭等二十鎊。二等十五鎊。則知毛君之調查誤矣。余遂在該公司換日本銀

圓及美國錢幣。並代秦毛二君稍換若干。蓋沿途多用日美錢幣。凡由上海動身赴美者。應先換若干日本錢。以備長崎神戶橫濱之用。過此則須用美幣。故宜多換美幣。英金鎊亦可換若干。隨處可用。此游美者所須知也。

余赴郵政局買郵票。查美國公司船上帳房備有郵票。隨用隨購。惟該船帳房非日本人。乃日人所用之客卿也。該帳房不備郵票。有時船將到一埠。三四點鐘前始懸信箱。（懸於帳房門外）迨開箱將信件取去。該帳房又不於信箱上貼一條 Close（信已不收字樣）亦不懸一告白。以致客人仍將郵件投之。擱誤郵期。有事彼推之水手頭目 Chief Steward 而該頭目又推之於該帳房。余回憶前次乘美公司船。見執事者每棹分配一人。招待搭客。事必躬親。言語和悅。故人多稱便。

余赴船公司換艙位。該公司始則信帳房之言。不欲更換。余云船由橫濱即開。已定船位者。皆定矣。未定者。則即係空艙。必至檀香山始有人上船。途中無可搭客之地。余房正近機氣管通熱氣處。熱度至八九十度。人何以堪。何妨以空房換之。換艙位之事。他船均可行。上次余渡太平洋大西洋時。如見空艙位。均可商換。間有彼此係熟人。不願相距太遠者。亦可設法換至相

近之處。此外如有不便之事。均能隨時變更。必使客人方便而後可。該公司繼見余有充分理由。即允照換。艙位之事辦妥。旋與秦毛二君赴一小公園看花飲茶。興盡而歸。

二十四號（禮拜二）

下午三點舟由橫濱開赴檀香山。余早晨與秦毛二君赴街市一游。並在正金銀行換日幣。見其規則甚密。凡錢投入。收之者即寫一條。交登記收帳人。再由他處取日幣。輾轉查閱。以免錯誤。惟行人殊不便耳。少焉與秦毛二君同赴一中國餐館小酌。因由橫濱開船後。旬餘在船皆西餐。中餐不能得也。下午二點返輪。毛君買圍棋一副歸。查船應於二十三號由橫濱開駛。今已遲一日。故駕船者開足汽輪。盼望三月五號。可以趕到檀香山也。

二十五號至三月四號

換房間一一三號。稍覺安適。船自橫濱開後。浪花大起。風雨交加。四晝夜不能安枕。毛秦二君稍畏風浪。搭客起者不過數人。余尚飲食如常。惟二日未行動。第五日大風。海水揚過船頂。水入艙中。滿房如河。余之衣箱等件一併爲水浸入。幸趕飭茶房 Cabin boy 來房提放高處。衣服尚未全濕。否則鹽水將衣浸透。則全壞矣。該船僕役伺候。殊不周到。往往按鈴數次。本房間之

茶房不來。而令他茶房來。來則有事必推於本房間茶房。不肯爲辦。展轉傳喚。本茶房始來。若肯早來。則余衣箱等尙不至如此之濕。可惡已極。上次由美洲回來。乘乃路之船。本房間之茶房。常川照應。絕不如此船之茶房。常不到也。尤可笑者。往往他茶房來。客云要茶。彼僅將茶取來。並不備茶杯。此種糊塗之人。用之伺候搭客。其疎失不言可知矣。


三月五號

是日早十二點到檀香山卓海君（海關中文翻譯）來船相會。余即介紹秦毛二君。赴註冊處填明下船事宜。醫生亦上船查驗。用一手機按之。點人數也。一望而竣事。午飯後即由卓海君介紹關員。余同秦毛二君赴中國領館。未登車之先。用德律風通知領館。美國德律風。又是一打法。機邊另置一書。上載某某處係用外國字母。分類如 A.B.C.D. 等而下。如打德律風至領館。英文係 Chinese Consulate 即查至 C 字處。再查 Chinese Consulate 該處左邊即有號數。領館係一九五二號。將鈴放下。以指按一。用手一旋即響。又以指按九以及五與二皆如之。如是領館即有接話者。比較先叫電話局。後再叫本人。省事多多矣。伍芷菴領事接電話。余云往拜之。遂由卓海君代覓一車。同赴領館。伍領事與李光亨王侃諸君均出見。並留晚飯。因船上出

告白云。是晚八點開船。應於五六點回船。余在船多日已困極。擬吸新鮮空氣。不能在領館晚飯。面謝之。惟先將秦毛二君船事詢問辦法。即與之赴船。開箱。請關員查驗。其實不過一開而已。並未一看。即付轉運公司。送去棧房。Majesty Hotel 余一面發電致舊金山總領事歐陽君。旋即赴養魚池一游。孰意大雨傾盆。將塵土洗淨。雨後天朗氣清。惠風和暢。分外宜人。檀地天氣較熱。雨後稍涼。游魚池之費。每人二角五分。（此後皆指美金）小孩一角。看畢秦毛二君赴領館之約。余遂赴海邊及樹林一帶遊覽。然後乘車返船。沿途縱觀各處園林。名花異草。令人心曠神怡。抵船後關員即對余云。現已改期。船定於明早八點開。余即用電話告知秦毛二君。七點四十五分伍李王秦毛諸君一同來船。暢談一切。至九點彼此握手言別矣。

六號

是日早八點開船。余尙高臥。天氣稍熱。舟將近檀香山則熱。將出檀香山亦熱。蓋離赤道不遠耳。列表如下。



七號至十一號

此數日在舟。覺一日比一日冷。因船漸漸向北行耳。舟中時有無線電來。中有一則云。紐約大雪。高與屋齊。美副總統困在雪中。竟日。春洋丸每逢禮拜六有電影。未到檀香山之先。則有人向客收錢。此乃賞船面 Deck 伺候者。伺候見客自帶椅子者。彼皆置於偏處。租其椅子者。則置之中間。此等惡習。亦應免也。

下船規則。當客人下船先一日。帳房發出一表。請各客自填各姓名住址。衣箱件數。中係何物。有無納稅之件。搭客應填明。在久經旅行者。則填自用衣服書籍等。Second hand clothes, books, etc. 左邊注數字。自用品 Personal effects 若係自己所用之物件。則無須上稅。並註明送至何處。下簽自名。即可送交帳房。

船未抵埠之先。即由帳房知照搭客。各至帳房。自填寫姓名年歲月日生辰。生於何處。曾充何項職務。現赴何處就何事。親自簽名於其下。

帳房於前一日發出告白。請人至飯廳將應行運送之行李查有幾件。即取繫繩之紙片。逐一書明。然後繫於行李上。以免錯誤遺失。

下船時行李均下至船塢。Deck 由關員查驗。如有護照者。不過一看而已。可囑運行李之人。直運至所欲往之處。至下行行李時。有 A.B.C. 等字之分。欲查取行李。可自往該處一查。卽在此處。如係錢姓卽往○字處一查。然 A.B.C. 等字有前後之分。亦須注意。

船將到岸。醫生上船查驗。人人須赴醫生處一行。給一憑單。然後上岸。移民局查驗護照。除由本國領事知會作爲特別辦理外。餘均須面詢情形。此皆抵美登岸之手續。尤須注意也。

附調查報告文件

上外交部呈 民國三年三月二十日

(前略)蒙 鈞部派赴金山。遵於二月十六日。由上海放洋。曾經電稟鈞座在案。是月二十四日由橫濱西渡太平洋。三月五日抵檀香山。三月十二日抵金山。當卽到領署任事。查金山爲東亞交通孔道。該埠有三黨。曰進步。曰憲政。曰國民。有華僑總商會。中華會館。中華僑民學堂。分會館有七。曰三邑。(番禺、順德、南海)曰肇慶。(開平、恩平)曰陽和。(香山、東莞)曰寧陽。(新寧)曰人和。(新安、嘉應州)曰岡州。(霍山、新會)曰和合。(新寧余姓)文選到時。均來接談。此外又有和平會。堂號甚多。工人常以格鬥爲事。上年文選由英赴美調查學務。道經金山時值

堂號互毆。連傷九命。堂號各圖占勝。如甲堂被乙堂傷一人。則甲堂亦即傷乙堂一人。所謂相抵者也。如甲堂多傷乙堂一人。則乙堂又必多傷甲堂一人。互相仇視。不可了結。比因有傷九命之事。文選曾經演說。勸華僑遇事不可互毆。宜各舉代表開會公議。評論是非。自可解決。萬不可先訴之於武力。以致輕視生命。貽笑外人。此和平會設立之所由來也。明年巴拿馬賽會在金山舉行。各國建築工程。本年六月可以竣工。金山用費本已超於他處。近因賽會之事。物價房租。又漸漸增高。華僑生計。頗為困難。聞工人當日除食用外。每日尙可餘一二元美金。近則不過餬口而已。故多往外埠。所以金山本埠華僑人數。日漸減少。近不過八千人。金山總領事所轄之地方甚多。如市卡哥羅省沙格門都旺沽魯斯雅托乞托能等。均係大埠。市卡哥爲美國商務中心點。羅省商務亦甚繁盛。他國設有領事。近來金山本埠及外埠僑民。本相安無事。惟日昨美政府派員來此調查華僑人數。擬令註冊。此事正在商辦中。以上僅就文選初到時。調查所得。謹先奉聞。嗣後遇有要事。自當隨時稟呈。俾鈞部得以知海外僑情也。(下略)

代擬上外交部書

(前略)

(一) 已辦之事宜

凡事有因有果。不獨外交爲然。法律能於修明。而後可望收回領事裁判權。華僑能各自治。然後苛例易爭。金山一埠。素稱華僑最多之處。攘往熙來。良莠不齊。稅關每慮華人來之者衆。百思設法限制。稍有一事不合。多方挑剔。苟無人調護維持。則華僑一舉一動。皆受其縛束。非獨商務受虧。且僑民生計見匱。其他因商業上之競爭。而施種種反對手段者。尤指不勝屈。近如(一)太平洋沿岸養雞家。以保護一己之利權。造謠中國雞蛋有礙衛生。報紙四布。指斥萬端。曾經力加辯駁。多方引證。以華蛋無礙衛生。美人始得釋然。是以上次溫哥華埠華蛋一次入口。計三百五十萬之多。以後仍源源而來。於中國商務不無裨益也。(二)日前金山大埠。抵制華貨一事。爲全美所注視。華僑商店。幾至歇業。曾經往返與西官申辯。並設法解決。風潮始息。華僑得以安業如恆。查金山爲水陸孔道。品類最雜。其重要者。(一)曩者華僑每年多有互毆致傷人命之事。去歲春間。竟傷多命。自到任後。勸勉各華僑。力圖自治。故一年來鬥毆之事甚少。西官見華僑日趨文明。故亦不過於苛待。在昔苛例之舉。雖係美國示人不公。然亦多半咎由自取也。(二)此間華僑登岸或回國。無故被稅關拘驗之事。時有所聞。偶有學生及游歷之

人因護照不完備。或乘二三等船位。亦間受拘留。故無論何時有船隻進口出口。不分晴雨。必親往照料。因與美關員皆相識。一經說明情形。立時可保登岸。故行旅稱便。與西官辦理交涉。臨事固貴持理衡情。開誠佈公。平時尤貴有交際之感情。與個人之友愛。故遇事方能迎刃而解也。至於奉 鈞部飭查各要事。亦無不隨時辦理。詳細稟呈。并擇暇親赴各埠調查商務。撫慰僑民。務使僑民有傾向政府之心。而登五族共和之治。以上爲已辦之事宜也。

(二) 應行之事宜

各國因爲提倡本國商務起見。故凡係外國商務繁盛之區。本國僑民如多者。無不派遣領事保護之。美爲新起之國。而各口岸之商務日見發達。尤以羅省技利斯雅托市卡哥三埠商務爲最盛。茲將三處情形分晰言之。

(甲) 羅省技利 (屬加利佛里省爲美之西南部) 天氣極佳。四時長春。所有美國官商富戶。均築居於此。以避寒天。而地宜種植。出品尤多。故商務極盛。今華僑在此者。已達二三千人。經商者爲多。若於該處添設領事一員。保護僑民。提倡商務。極爲有益。他處設領事。不過聯絡美國一省之商民。如在此處設領事。可以聯絡全美最上等之紳商。而於國交商務。皆甚有益。且羅

省技利之森的愛哥與墨國之恩省那打相近。所謂加利佛里低地。（墨屬）也。（一）鑛產豐富。（二）沃野千里。果品繁盛。（三）魚產最富。商務極大。中國久與墨國通商。華僑在此二處營業及工作者亦多。若在羅省技利設立領事。可以就近照料墨美二國之華僑。蓋在墨國我國之領署。（現改使署）離此過遠。約二千英里。（一英里合華里三里三）有鞭長莫及之勢。况該地處美墨交界之區。華人由墨入美。時有交涉。尤關緊要。茲將已在羅省技利埠設立之領事列下。

智利。法蘭西。巴拿馬。英吉利。德意志。古巴。墨西哥。以上係設立正領事。
比利時。秘魯。瑞士。義大利。那威。以上係設立副領事。

（乙）斯雅托（屬華盛頓省爲美之西北部。又譯作舍路）所有美國良木麵粉出口。以此處爲大宗。常有巨輪開往中國。華僑之在此居處者有一千餘人。現有名譽領事一人。該地水陸交通。商務日益發達。且英屬之亞拉司卡魚產皮貨及鑛產。均由此出口。商務尤爲繁盛。此間亦宜改名譽領事。而添設正領事。茲將各國已在斯雅托設立之領事列下。
法蘭西。德意志。義大利。日本。秘魯。以上係設立正領事。

比利時。丹馬。英吉利。荷蘭。那威。瑞典。以上係設立副領事。

(丙)市卡哥(屬益利省爲美之中部又譯作芝加高)爲美國商務之中心點。亦卽全美鐵路之中心。如我國之漢口然。製造繁興。一切貨品均在此裝載。運送各處。紐約爲美國第一商埠。而市卡哥爲美國第二商埠。華僑在此營業者有二千餘人。而在附近工作者尤多。華僑在該埠經商者資本亦厚。爲他埠所不及。見有一中國餐館。資本達十萬美金以上。(合中國二十餘萬元)其他可想而知。華人商務在美國者。以市卡哥爲冠。且東距紐約(該處設有領事)尙遠。西距金山尤遙。商務既盛。僑民亦多。宜設領事。得以常駐該處保護僑民。茲將各國已在市卡哥設立之領事列下。

英吉利。荷蘭。土耳其。奧地利。以上係設立總領事。

比利時。巴西。丹墨。法蘭西。德意志。希臘。義大利。日本。墨西哥。那威。祕魯。波斯。葡萄牙。俄羅斯。暹羅。西班牙。瑞典。紐絲綸。以上係設立正領事。

以上三處。各國既久已設立總正各領事。獨我國缺然。不獨華僑不能受保護之益。而於國際上亦覺遜色。方今政府日以撫慰華僑爲急務。是各埠添設領事。尤不可緩。以上爲應行之事。

宜也。

(二) 設備之事宜

(甲) 移民政策。國以民爲本。民以食爲天。我國自共和成立以後。四民失業。盜賊如毛。加之水旱偏災。民生尤困。飢寒所迫。挺而走險。與其事後置之於法。有傷天和。何如先爲籌畫。使其得謀生計。若化沿海盜匪爲良民。得工資而自養。計惟有設法與美政府交涉。取銷禁工例。使華人可以出洋赴美國各處作工。內地工人歲不過數十元之工資。若赴美作工。除食用外。每歲可得三百元美金。(合中幣六百元)查本埠商報。調查上年美國華僑匯回香港通用銀共七十兆元。合美金三十四兆三十萬元。雖不如一九一三年匯歸美金三十八兆元。及一九一二年匯歸美金四十二兆五十萬元之多。然歲得中幣七十兆元之數。亦可謂鉅矣。此項銀元多係華僑工值。及經商所得。此僅據匯票單之數目調查之。而華僑回國隨身所帶者。尙不在此數之內。

(乙) 僑民教育。華僑來美既衆。其子弟亦多。久之幾忘其祖國。故教養華僑子弟。亦爲急務。刻下雖有僑民自立之學堂。或因提倡無人。以致經費不足。或因教科不備。有名無實。應由中

央教育部每年補助僑民學堂經費若干。以資提倡。并由中央派遣校長及教員來美。督理一切。華僑子弟久在外洋。西學多已有根柢。若再陶之以中學。將來人才輩出。收效必宏。而較之派遣學生出洋。尤事半功倍。且華僑子弟久在外。於外國實業情形亦所深悉。將來倘得多數人才回國。振興實業。實爲我國前途之福。如果華僑子弟多爲國用。則華僑之心未有不傾向政府者也。將來籌款募債。以及振興內地實業各事宜。華僑當必爲之助。此事深望我政府高掌遠躡。極力推行。萬不可惜此而失彼。以上爲設備之事宜也。(下略)

論太平洋公司及美國情形

(一) 售船原委

此次余請假返國。乘太平洋公司之差拿船。於十五日抵神戶。該公司是日接金山總公司來電。云該公司船隻。如滿州蒙古高麗西比利亞差拿等船。一併售與紐約大西洋公司。Atlantic Transport Co. N. Y. 該公司係摩根 I. P. Morgan 所組織。(英美及他國船隻合組)爲美國東方極大公司。將來此項船隻。卽由紐約開往英倫。因英國船隻開戰以來。損失者甚多。不敷應用。茲太平洋公司出售此項船隻。正合其用。一時在東方美國人士。皆交相扼腕。以美國

拋棄此太平洋內之權利爲失策。獨某國人皆額手相慶。然太平洋公司何以出賣船隻。其中大有原因。當余未行以前。該公司總理司威令向余聲稱。該公司不久停辦。非因生意不佳。實因新例頒行不用華人也。不日赴華盛頓與政府交涉。取銷此例。如不能達到目的。將船隻一律售出。卽行停辦云云。查該公司停辦原因。(一)新例不用華人。該公司大受影響。以上各船所用水手。計達一萬二千人左右。華人工資每人每月不過華幣十五元。若用西人。則須每名每月美幣三十元。(約華幣七八十元)是用西人一名。可用華人五名。西人作工不如華人之勤苦。且飲食又須精善。不似華人僅食客餐所餘者。并須要求作工時間。及禮拜日休息之種種權利。(二)當此歐戰方殷。需船極多。該公司既被新例縛束。不能進行。此時如能售出。反較平日得價爲高。該公司資本二十兆元。已航行多年。船隻多已近舊。平時出售不過收回半價。今則可得回原數。此又不能不急求出售者也。

(二) 商務影響

太平洋公司此項船隻。在他人觀之。不過此一公司轉移彼一公司。無所驚異。然此舉中美兩國商務大受其困。查美國在太平洋沿岸。嗣後僅有滿利素打一船。由舍路開行來華。金山檀

香山及他處。均無船航行中國。及東方各處。而我國向無船隻往來太平洋沿岸。惟某國從此可以獨攬其利。查金山爲出入口之重鎮。而無美輪航行。中國物品向來先運至金山。然後分銷各處。此次忽然斷絕。其害甚大。查一千九百十三年華人由金山匯回香港之銀數。約計四十兆元美金。一千九百十五年約三十八兆元美金。本年統計雖未發表。大約其數亦不下四十兆左右。金山自我與某國交涉發生以後。竭力抵制某國貨品。今若某國船不載華貨以報復之。則華商各舖立時倒閉。卽代轉運。凡當某貨暢銷時。先運某國之貨。華貨落後。操縱由彼。故美國失此航線。雖大受影響。然受其害尙緩。若華僑則立蒙其損失。爲今之計。我國應由政府從速倡辦航美輪船公司。若因資本問題。刻下迫於情勢。不獨美國人士願出資本一半。（前實業團到美曾有是議。云中國果能籌一半。無論資本多少。美國願籌一半。）卽華僑亦願盡全力贊助之。金山檀香山香港（爲運貨總口）等處。各商家尤必踴躍從事。大約我國籌款五百萬。合美股五百萬。購船數艘。先行開辦。以後再陸續擴充。查日本郵船赴美公司。每年由政府津貼四百萬元爲補助費。良以無公司航行。日貨不能行銷美國。國內工商業卽無發達之望。而國家之收入每因之減少。直接雖年耗津貼四百萬。然間接收入不下數千萬。故不惜

小費。而圖大計。當此太平洋將停辦之際。若我國卽行倡辦。一經招股。必甚踴躍。此誠千載一時好機會。乃我中華民國大有利益之事也。

按金山華僑現已組織輪船公司。購得姜拿船一艘。航行金山與香港之間。生意極好。此爲我華人有海外航輪之始。果我政府與他團體再竭力推行之。則海外貿易。必日加展布。而內地工商業亦因之大爲發達也。

(二)美國內情

此次美國創立水手新例。以熟習英文爲合格。實則工黨爲抵制華工起見。下院倡議。上院贊成。美總統簽字。頒行爲律。舉國上下早已知此律爲美人自殺之政策。而上下院贊成實行者。工黨勢力爲之也。美國號爲共和。識者常云政權操於工黨。凡係白種由他國來美者。五年卽有選舉權。不問財產學問出身等項也。此等白人。多係在本國而無生計者。或因事故遠來美國。半係中下等人民。多於文字不甚通澈者。每當選舉之時。竭力運動。必與工黨親近者。方選舉之。往往真正美國有學識之人反難當選。所幸者工黨選舉之人。尙有聲望。而無他弊。但凡被選舉之官吏。當未被選之先。必須與工黨祕約。以得官吏後。允爲提議。或辦理某項與工黨

有利益之事。故被選後卽行報酬。以踐其約。否則從此以後。卽不能被舉爲官吏也。每選舉一次。卽有一次迎合之事件發生。故今日工黨勢力甚大也。美國有此太平洋公司。航行多年。直接間接爲美國加增每年入口稅數千百萬之收入。今僅徇工黨之請。將此重大權利斷喪無餘。東方各西報近日無不譏爲失策也。

略述華入歐美之始末

(一) 華入歐之始

考西歐之有華人踪跡。約在十四五世紀之時。傳說道光二十五年。有同式之一船。由上海繞好望角。駛入倫敦之太晤士河。或云華人入歐自此始。

華官赴歐最早者。爲斌椿於同治四年奉派西行。歷聘各國。光緒朝初葉。又派郭嵩燾爲特使。劉錫鴻爲副使。分赴英法義比德俄。呈遞國書。覲見各該國元首。此爲駐外公使之先聲。旋即任郭氏爲英法義比公使。任劉氏爲德俄公使。郭氏未得終任。卽以曾紀澤代之。自是以後。總理衙門(後改外交部)卽遣派公使分駐各國。如英美法德俄奧意等國。各使館除參贊隨員外。并有學生數名。(近名之曰主事)可以於駐在國學習語言文字。以爲譯才之

預備。可望參隨公使之升階。

當郭曾二氏駐外之時。歐洲官費學生。始見萌芽。最先者李合肥派武弁數人。赴德留學。當郭氏回國之年。北洋遣派海軍學生二十餘人赴歐留學。卽丁汝昌等。另有文學生八人。留法二人。留英六人。（中有嚴幾道先生。）彼時伍秩庸先生亦自費留英。嗣後雖亦有續派之舉。然自甲申至戊戌實爲歐洲留學界中衰時代。自戊戌政變以後。卽開留學界新紀元。北洋湖北及上海製造局。南洋公學。合派三十餘人出洋留學。庚子拳匪亂後。外交日逼。知非多造就西學人才不可。於是各省亦遣派學生赴歐留學。甲辰乙巳之間。北京大學堂。譯學館。及湖北江蘇等處。分派學生出洋。自是以後。留學生日見增多。及至宣統庚戌。余赴英時。英國官費生已有一百二十餘人。法國約五六十人。比國約六七十人。德國約二三十人。共有二百六七十人。自費生人數當有過之無不及。此爲華人入歐之大略情形也。

（二）華人入美之始

考美國舊金山相傳其地產金。道光二十八年。始有人挖取。繼則各國之人。趨之若鶩。其時有華人充水手者。見利甚厚。乃亦爲之。獲資回國。播言北美情形。力勸親友西航。而待遇與

歐無異。自是漸有華人渡美。或云此爲華人入美之始。至咸豐元二年間。連引日多。始創三邑陽和四邑（新會、新寧、恩平、開平）三會館。三年分四邑之新寧爲寧陽會館。分陽和之新安爲人和會館。同治元年新寧余姓復合四邑之恩平開平爲合和會館。而四邑之名旋改爲岡州。卽以前六大會館之歷史也。嗣因金鑛開盡。咸改歸他項工作。如捲烟葉。做織絨布。洗衣。打纜。築鐵路。力田作。牧牛羊。華人工良價賤。日用節省。西人之工技未嘗不爲所奪。又因寧陽合和兩會館鄉人往者日衆。工價日減。西人更日恨一日。勢難兩立矣。西人中有某國人。以其黨衆已入美籍爲官。故多方爲難。專欲阻礙華工。夫美立國前。皆紅皮土番所居。而得自立者。全賴各國之人往歸者衆。合而成爲西半球之雄國。華人之往者。初亦意其必入籍爲民。而不意得資卽行回國。既不能得其爲民。則不得不設法禁止。此所以有禁止華工入美之苛例發生也。

至留美學生之發動亦甚早。考光緒二年七月間。有留學美國華童一百十三人。隨其教師劉雲房其駿總局繙譯鄺其照自哈佛赴費城觀博覽會。並見美國大總統於總理會務所。延見時美國大總統起立一一握手。面談數語。自是以後。各省以及南洋華僑子弟。時有自

費赴美留學之舉。但爲數不多。戊戌變政而後。庚子拳亂以還。北京大學堂譯學館以及各省紛紛遣派學生赴歐。亦同時遣派學生赴美。是以留學生人數日見增多。迨美國退回庚子賠款。我國於北京西直門外清華園。建立清華學校。聘請美國教習教授。按年遣派學生赴美留學。而各省亦時有派遣學生之舉。宣統癸丑夏。余由英赴美時。美國官費生幾達三百人。一九一四及一九一五年。清華學校遣派學生赴美。適余在金山領署。代爲照料登岸事宜。并在海關代辦理各生入境證明書。寄交華盛頓使署轉交周校長寄梅。分發各生。凡華人入境。非有此不可。否則關員查出。卽以爲工人。勒令出境。此兩年所送學生。約一百六十餘人。并有女學生二十餘人。實爲破天荒之舉。前次雖偶有一二女生留學。而係自費也。清華學校後又每年繼續遣派學生赴美。故今日留美學生。實較歐洲爲多。將來更日新月盛。造就無數人才。此不能不歸之美國退回庚子賠款之功。此爲華人人美大略情形也。

按以上所述華人人歐美之始末。僅就所知而言。且係大略而已。其實吾華人先達或具冒險之精神。航海以闢工商業。或抱留學之志願。越國而求新知識。無名英雄。自來有人。惟事久年遠。無人考記。以致湮沒不彰。苟世無哥倫布。西人焉能知東方有古國。若先達

無冒險之事業。華人何能知歐美有新邦。况哥倫布得有指南針。始能發現新航路。而成五大洲互市之局。考指南針原係華人發明。使無華人先赴歐洲。哥倫布又從何而得之。以理想而論。華人航海事業。實在各國之先。冒險之功。亦居各國之首。西人今日言及哥倫布無不崇拜之。名列史冊。功垂竹帛。吾華先達惜不知其名。西人固無從記其盛事。卽華人亦難述其功德。余記此只從某年某事起。不及最先航海如哥倫布者。實因不知先達何名暨何年月有此創舉。使先達有靈。當亦見諒也。

調查駐在國商情。爲領署之職務。余到美後卽留心調查。以期推廣商業。就中以絲茶爲我國出口大宗。茲將各國銷售於美國之絲茶。調查確數。以資比較。列表於下。

(茶)

中國	重 量		總 數	
	一九一三年	一九一四年	總 數	總 數
	二二、四〇三、三八五	一九、八一五、四六〇	三、〇八八、六八九	二、六九六、一五五

英國

一九一五年

二二、七五七、〇一二

三、〇九三、五九二

一九一三年

九、三二〇、三七七

二、六六四、九四四

一九一四年

一〇、五九二、三五九

二、八七六、五九一

一九一五年

九、八八〇、九一八

二、六二八、三二六

坎拿大英屬

一九一三年

二、一七六、三七七

六二七、七八二

一九一四年

二、一四五、四六七

六一一、五六〇

一九一五年

二、五一五、一三七

六九九、九〇七

東印度

一九一三年

八、一六五、〇一八

一、三一六、九九三

一九一四年

七、八五四、四六七

一、三五二、一七八

一九一五年

一一、〇〇一、一五三

一、八三二、九五二

日本

一九一三年

四一、五八五、七〇九

七、二〇八、八六〇

一九一四年

三七、二七六、三二一

六、一九一、一六八

一九一五年

三九、五五四、六八三

六、七三三、九八七

其餘他國

一九一三年

八五〇、〇〇二

一六五、六四八

一九一四年

九二八、九八一

一七八、五六二

一九一五年

八六五、六七四

一二八、九六四

總數

一九一三年

共茶銷

八四、五〇〇、八六八

共目價

一五、〇七二、九一六

一九一四年

二一、九九四、一〇九

七三、五八四、九九〇

一九一五年

一八、六五八、二九二

五八、八〇四、〇二〇

(絲)

		重	量	總	數	價	目	總	數
中國									
	一九一三年			四、二四九、四六二			一〇、五六七、四九六		元
	一九一四年			四、四九〇、〇〇二			一一、八五一、八〇七		
	一九一五年			三、六二一、八四一			八、三五七、八八六		
法國									
	一九一三年			一〇一、六三八			二九三、三七三		
	一九一四年			四五、九一七			一五六、一四四		
	一九一五年			三二、五六八			一二四、〇八七		
意大利									
	一九一三年			二、〇八〇、七二一			七、六九八、六一五		
	一九一四年			一、三五〇、八八三			五、八八六、二二九		

其餘他國	一九一五年	一、三六五、四五二	五、三七一、三〇五
	一九一三年	一二二、一五六	四四三、八一八
	一九一四年	二九九、四三六	一、一一一、四七八
	一九一五年	一三、〇三二	五八、二〇四
日本	一九一五年	一三、六二五、四〇〇	四四、八九二、五三八
	一九一四年	一五、八〇七、八七一	五四、五七九、三三二
	一九一三年	一三、六九五、九九三	四五、一六九、三九三
	共絲銷	二〇、二四九、九七〇	六四、一七二、六九五
總數	一九一五年	一八、六五八、二九二	五八、八〇四、〇二〇
	一九一四年	二一、九九四、一〇九	七三、五八四、九九〇
	一九一三年	二〇、二四九、九七〇	六四、一七二、六九五
	共目價	共絲銷	共目價

民國四年美國華僑之調查

(一)中國移民至美國嘉尼佛里省 California 在西歷一千八百四十九年。首先至者。爲阿

奇君 Ah Chi

(二)中國移民至美國最多數時。在一千八百八十年。及一千八百八十七年。與一千八百八十八年。

(三)自一千八百八十八年以後。中國移民即停止再入嘉省。

(四)一千九百十五年。中國人在嘉省居住者。約計二萬七千七百六十四人。

(五)以男女比較。二千五百八十六男子中。約有女子一人。

(六)中國人在舊金山大埠居住者。一千九百十五年。約計有六千九百十四人。

(七)中國人在美國內居住者。一千九百十五年。約計有五萬六千七百五十六人。

(八)中國人在美國內普通之職業。以餐館、(雜碎館)廚工、洗衣、爲主要。

(九)中國人在美國內特別經營之事業。以雜貨、商品、古董、爲主要。

(十)中國人在美國最著名之人物如下。

(甲)舊金山大埠。爲伍盤照、鄭文光、唐邦陸、潤卿、劉興等。

(乙)羅省吉利。爲劉松開、梁詒陳、國興、何利等。

(丙)撒葛門托。爲余樂三等。

(丁)市卡哥。爲湯信等。

(戊)波斯頓。爲陳奇水等。

(己)檀香山。爲程水馮、昆等。

一千九百十五年巴拿馬賽會中國與會人員列下

監督處人員

姓	名	號	省	分	縣	名	職
陳	琪	蘭	薰	浙	江	青	田
沈	祚	延	芭	舫	浙	江	出
歐	陽	祺	如	山	廣	東	香
陳	承	修	淮	生	福	建	主
							任
							交
							股
							長
							督
							務

李宣諫		福建	主
章祖純子	山浙	江吳興	主
周清任伯	伊山	西	主
周椒青			監督處英文祕書
夏夔球			監督處漢文祕書
裘毓麟	浙江		監督處英文繙譯
熊崇德	廣東		監督處英文繙譯
桂一山			監督處會計員
陳魚			監督處庶務
何世準			同
于后基			同
關伊			同
華英德女士			
束曰潞易	嚴江蘇		建築政府館工程委員

黃希珍

江
西

建築政府館工程委員

各省暨各處特派出品代表

[illegible]

上	海	劉	松	甫		古	畫	出	品	代	表				
上	海	何	林	一		上	海	新	華	貿	易	公	司	代	表
北	京	清	華	學	校	楊	永	清	惠	慶	代				表
北	京	清	華	學	校	黃	宗	發	達	三	代				表
交	通	部	夏	昌	熾						代				表
廣		東	褚	澤	生						代				表
廣		東	馮	耀	卿						代				表
廣		東	徐		良						代				表
四	川	王	國	輔							代				表

附華茶得獎之由來見上海神州日報（民國四年七月）

巴拿馬賽會。我國賽品甚多。最要者爲絲茶兩項。絲類原質極佳。然製造方法尙不及法蘭西意大利兩國之精美。獨茶葉一項。大可與外人爭勝。故當會場總理聘請萬國審查員時。我國賽會監督。知華茶關係重大。非得一熟悉外交與西人素有感情之人。不能與某國爭衡。特推

薦金山領事錢文選君充萬國審查員。會場總理摩亞君即送聘請書聘錢君擔任。錢君以事關全國。出爲辦理。當審查員開會時。某國即要求大獎。以其銷茶於美國爲最多。錢君即抗議。云此次爲萬國賽會。非美國一國賽會。中國有四百兆人民。無不飲茶。華茶久已銷售於歐美各國。比較銷路與人數。華茶當得大獎。某國審查員無以對。各國審查員均以錢君之議爲充分。然某國審查員多方運動。非得大獎不可。後有人提議。分茶爲二類。(一)紅茶。(二)綠茶。中國銷於外洋之茶。多係紅茶。某國則係綠茶。均舉其大宗而言也。使兩國各得其一。意在調和。某國欲使中國不得大獎。以便其茶葉暢銷。故又提議。以某處應得紅茶大獎爲言。蓋某處亦出紅茶也。復經錢君駁之。云中國二十二行省皆出綠茶。地方均較某處爲大。如某處能得紅茶大獎。中國各省亦應均得綠茶大獎。旋有美國海關查驗茶葉進口員。此次亦聘充審查員。遂云余在華多年。茶葉最好之省分。當推安徽。江西。福建。湖南。湖北。江蘇。浙江等七省。如給某處大獎。此七省當然應得大獎。衆議贊成。於是定案。某國賽會監督猶復迭次提議。請交高級審查員查核。均主張不可更改。如偏重某國。錢君必起反抗。何以對中國。美國當以公道出之。後金山某報紙。曾載有新聞一則。云中國與某國因茶葉得獎事極力爭之。意在駕乎某國之

上。否亦與某國相等。刻由某國監督多方交涉及運動。是以茶葉得獎之事尚未發表云云。足見茶葉得獎之事。某國全國人士均甚注意。然終不得爭勝於中國者。錢君之力也。錢君茲因請假由美返國。昨已來皖省。聞赴巡按使署報告一切。並探聞中國賽會監督。有公文咨行皖省。略云錢君文選前因瞻懷桑梓。願擔任照料安徽出品義務。不領薪津。經本處咨明請另給委飭。俾符名義。而收臂助。旋准咨復照行。並另給飭委在案。查該員自奉委以來。對於皖省賽品竭力照料。深資倚畀。其熱心毅力。迥出尋常。旋接辦審查。因該員嫻熟西文。學驗均富。復經推薦爲分類審查官。會同國際審查員考察評獎。對於我國茶葉一項。尤爲注意。現在獎品行將發表。計全國茶葉得大獎者凡有七省。安徽亦在其列。其餘亦均得名譽獎章及金牌等等。是該員確以熱誠之競爭。恢復國產之名譽。其成績卓著。洵未便令其湮沒不彰。除報部外。相應咨明貴巡按使查照備案。云云。

(注)此次重游美國。去時稍記大略。回時所以無日記者。因前次由英赴美回華時。已略言之矣。故此次重游。無須再述。以免重複。至巴拿馬賽會事宜。雖有紀述。但已見他人輯有專書。是以刪去。

讀環球日記書後

幼讀班史西域傳。心嚮往之。惜其語焉而不詳。弗克起古人而祛疑殆。嗣讀吾蘇薛庸庵星使四國日記。則以爲鄉先達親歷之境。以視昔人鑿空之談。不益信而可徵乎。然庸庵之書。吾讀之矣。究未及見其人也。今幸從先生後舉。先生之言論風采。旣朝夕親炙之矣。又得飽覽先生之著述。然則吾今者讀先生之環球日記。又勝於讀庸庵之四國日記多矣。先生以槃槃大材。銳意勇往。事事留心。故能舉五洲各國政治風俗。學校人才。以及形勢之險要。梯航之道里。下至物產氣候。工商器械諸大端。扼要而譚。如指諸掌。蓋苦心考察四五年。隻身周游九萬里。輯成是編。歸餉祖國。吾人安居戶內。手是編而瀏覽焉。不數日間。卽能稍知海外大勢。先生嘉惠之宏。其價值寧有限耶。尤有進者。比年以來。士夫學子。歸自外洋。侈語他國之富強。並欲效其所短。訾議吾國之貧弱。甘自沒其所長。惟先生平情察理。不爲皮相之談。審己觀人。各有精神所在。務於立國之本。致治之原。互證參觀。折衷一是。至於論風俗。仍推中國爲淳厚。勸華僑。尤以中學爲前提。而萬國人種聯合大會之演說。則又以孔教爲獨尊。非惟愛國心長。亦先生學識之純正。實有超越等夷者。若夫爭定留英學額。籌墊留學經費。巴拿馬賽

會。抗議華茶應得大獎。其功德被於商學兩界者。尤卓卓可傳。總之先生貫中西之學術。富教育之經驗。具政治之眼光。並擅外交之手腕。吾國家果於海內求人才。徵先生其誰與歸。承先生以此編校勘之役見委。於其既也。謹書其後如此。

丹徒許濟棻

士青先生，

小白臉，

眉清目秀，

近視眼。



正

誤

表

序記 由序 袁序 日記 同 同 同 同

頁 二 一 一 三 三 六 六 七

行 二 五 三 三 三 一 四

誤 滋愈 中洲 七十噸 海夾 爲有 乃樂 卜電博

正 愈滋 中洲 七千噸 海峽 自有 乃路 卜雷博

中華民國九年四月出版

環游日記每冊價洋四角

著作者廣德錢文選

版權
所有

